

大般涅槃經

(三十六卷：第七卷至第九卷)

北涼天竺三藏曇無讖譯 梵

宋沙門慧嚴慧觀同謝靈運再治



南無本師釋迦牟尼佛

說 明

本繁體校正版《大般涅槃經》(南本)電子書，是根據《乾隆大藏經》大乘涅槃部，第0110部，北涼天竺三藏曇無讖譯梵、宋沙門慧嚴慧觀同謝靈運再治《大般涅槃經》(36卷)影印本校正的。標點符號僅供參考。

為了便於讀誦，本電子書按順序每三卷合為一冊，共十二冊。若每天讀一冊，可十二天讀完。

本電子書是免費結緣品。特此說明。

仁慧草堂

二〇一八年九月

目 录

起誦儀	- 1 -
香讚	- 1 -
開經偈	- 1 -
大般涅槃經卷第七	- 2 -
邪正品第九	- 2 -
四諦品第十	- 17 -
四倒品第十一	- 20 -
大般涅槃經卷第八	- 22 -
如來性起品第十二	- 22 -
文字品第十三	- 45 -
鳥喻品第十四	- 52 -
大般涅槃經卷第九	- 60 -
月喻品第十五	- 60 -
菩薩品第十六	- 66 -
結誦儀	- 95 -
補闕真言	- 95 -
發願文	- 95 -
迴向偈	- 96 -
迴向偈	- 96 -
三皈依	- 97 -

●起誦儀

香讚

(一編)

爐香乍爇. 法界蒙薰. 諸佛海會悉遙聞. 隨處結
祥雲. 誠意方殷. 諸佛現全身.

南無香雲蓋菩薩摩訶薩 (合掌三稱)

南無本師釋迦牟尼佛 (合掌三稱)

開經偈

(一編)

無上甚深微妙法 百千萬劫難遭遇
我今見聞得受持 願解如來真實義

大般涅槃經卷第七

北涼天竺三藏曇無讖譯 梵

宋沙門慧嚴慧觀同謝靈運再治

邪正品第九

爾時，迦葉白佛言：「世尊！如上所說四種人等，應當依止耶¹？」

佛言：「如是，如是。善男子，如我所說，應當依止。何以故？有四魔故。何等為四？如魔所說諸餘經律能受持者。」

迦葉菩薩白佛言：「世尊！如佛所說有四種魔。若魔所說及佛所說，我當云何而得分別？有諸眾生隨逐魔行，復有隨順佛所教者，如是等輩，復云何知？」

佛告迦葉：「我般涅槃七百歲後，是魔波旬漸當壞亂我之正法。譬如獵師，身服法衣。魔王波旬亦復如是，作比丘像、比丘尼像、優婆塞像、優婆夷像，亦復化作須陀洹身，乃至化作阿羅漢身及佛色身。魔王以此有漏之形作無漏身，壞我正法。是魔波旬壞正法時，當作是言：『菩薩昔

¹ 大正藏：應當依止耶；永樂北藏及龍藏：應當依耶

於兜術²天上沒，來在此迦毗羅城白淨王宮，依因父母愛欲和合生育是身。』若言有人生於人中³，為諸世間天、人大眾所恭敬者，無有是處。又復說言：『往昔苦行，種種布施頭目、髓腦、國城、妻子，是故今者，得成佛道。以是因緣，為諸人、天、乾闥婆、阿脩羅、迦樓羅、緊那羅、摩睺羅伽之所恭敬。』若有經律，作是說者，當知悉是魔之所說。

「善男子，若有經律，作如是言：『如來正覺久已成佛，今方示現成佛道者，為欲度脫諸眾生故，示有父母，依因愛欲，和合而生，隨順世間，作是示現。』如是經律，當知真是如來所說。若有隨順魔所說者，是魔眷屬；若能隨順佛所說者，即是菩薩。

「若有說言『如來生時，於十方面各行七步不可信』者，是魔所說。若復有說『如來出世於十方面各行七步，此是如來方便示現』，是名如來所說經律。若有隨順魔所說者，是魔眷屬；若能隨順佛所說者，即是菩薩。

「若有說言：『菩薩生已，父王使人，將詣

² 大正藏：率

³ 大正藏：若言有人生於人中；永樂北藏及龍藏：若有人生於人中

天祠，諸天見已，悉下禮敬，是故名佛。』復有難言：『天者先出，佛在其後。云何諸天禮敬於佛？』作是難者，當知即是波旬所說。

「若有經言：『佛到天祠，是諸天等，摩醯首羅、大梵天王、釋提桓因，皆悉合掌敬禮其足。』如是經律，是佛所說。若有隨順魔所說者，是魔眷屬；若能隨順佛所說者，即是菩薩。

「若有經律說言：『菩薩為太子時，以欲心故，四方聘⁴妻，處在深宮，五欲自娛，歡悅受樂。』如是經律，波旬所說。若有說言：『菩薩久已捨離欲心、妻息之屬，乃至不受三十三天上妙五欲，如棄涕唾，何況人欲？剃除鬚髮，出家修道。』如是經律是佛所說。若有隨順魔經律者，是魔眷屬；若有隨順佛經律者，即是菩薩。

「若有說言：『佛在舍衛祇洹⁵精舍，聽諸比丘受畜奴婢、僕使、牛、羊、象、馬、驢、騾、鷄、豬、貓、狗、金、銀、瑠璃、真珠、玻瓈、碑磬⁶、碼碯、珊瑚、琥珀、珂貝、璧玉、銅、鐵、釜鍍、大小銅盤所須之物，耕田種植，販賣市易，儲積穀米。如是眾事，佛大慈故，憐憫眾

⁴ 大正藏：娉

⁵ 大正藏：陀

⁶ 大正藏：車渠

生，皆聽畜之。』如是經律悉是魔說。若有說言：『佛在舍衛祇陀精舍那梨樓鬼所住之處，爾時，如來因婆羅門字殺羝德及波斯匿王說言：「比丘不應受畜金、銀、瑠璃、玻瓈、真珠、碑磔、碼碯、珊瑚、琥珀、珂貝、璧玉、奴婢、僕使、童男、童女，牛、羊、象、馬、驢、騾、鷄、豬、貓、狗等獸，銅、鐵、釜鍍、大小銅盤、種種雜色床敷卧具、資生所須所謂屋宅，耕田種植，販賣市易，自手作食，自磨自舂，治身呪術，調鷹方法，仰觀星宿，推步盈虛，占相男女，解夢吉凶，是男是女、非男非女，六十四能，復有十八惑人呪術，種種工巧，或說世間無量俗事，散香、末香、塗香、薰香，種種華鬘治髮方術，姦偽諂曲，貪利無厭，愛樂憤鬧，戲笑談說，貪嗜魚肉，和合毒藥，治壓香油，捉持寶蓋及以革屣、造扇、箱篋、種種畫像。積聚穀、米、大小麥、豆及諸果蓏，親近國王、王子、大臣及諸女人，高聲大笑或復默然，於諸法中多生疑惑，多語妄說長短、好醜、或善不善，好著好衣，如是種種不淨之物於施主前躬自讚歎，出入遊行不淨之處，所謂沽酒、婬女、博弈，如是之人，我今不聽在比丘中，應當休道，還俗役使，譬如莠稗，悉滅無餘。』』

當知是等經律所制，悉是如來之所說也。若有隨順魔所說者，是魔眷屬；若有隨順佛所說者，即是菩薩。

「若有說言：『菩薩為欲供養天神故入天祠，所謂梵天、大自在天、韋⁷陀天、迦旃延天。所以入者，為欲調伏諸天人故。若言不爾，無有是處。』若言：『菩薩不能入於外道邪論，知其威儀、文章、技藝，僕使鬪爭⁸不能和合，不為男女、國王、大臣之所恭敬，又亦不知和合諸藥。以不知故，乃名如來。如其知者，是邪見輩。』又復：『如來於怨、親中，其心平等，如以刀割及香塗身，於此二人不生增益、損減之心，唯能處中，故名如來。』如是經律，當知是魔之所說也。

「若有說言：『菩薩如是示入天祠、外學法中出家修道。示現知其威儀、禮節，能解一切文章、技藝。示入書堂、技巧之處，能善和合僕使鬪爭。於諸大眾，童男、童女、後宮妃后、人民、長者、婆羅門等王及大臣、貧窮等中最尊最上，復為是等之所恭敬。亦能示現如是等事。雖處諸見，不生愛心，猶如蓮華，不受塵垢。為度一切

⁷ 大正藏：達

⁸ 大正藏：諍（後同）

諸眾生故，善行如是種種方便，隨順世法。』如是經律，當知即是如來所說。若有隨順魔所說者，是魔眷屬；若能隨順佛所說者，是大菩薩。

「若有說言：『如來為我解說經律，若惡法中輕重之罪及偷蘭遮，其性皆重，我等律中終不為之。我久忍受如是之法，汝等不信，我當云何自捨己律，就汝律耶？汝所有律是魔所說，我等經律是佛所制。如來先說九部法印，如是九印印我經律。初不聞有方等經典一句一字，如來所說無量經律，何處有說方等經耶？如是等中，未曾聞有十部經名。如其有者，當知必定調達所作。調達惡人，以滅善法造方等經，我等不信。如是等經，是魔所說。何以故？破壞佛法相是非故。』如是之言：『汝經中有，我經中無。我經律中，如來說言：「我涅槃後，惡世當有不正經律，所謂大乘方等經典。』』未來之世，當有如是諸惡比丘。我又說言：『過九部經有方等典，若有人能了知其義，當知是人正了經律，遠離一切不淨之物，微妙清淨猶如滿月。』

「若有說言：『如來雖為一一經律演說義味如恒沙等，我律中無，將知為無。如其有者，如來何故於我律中而不解說？是故，我今不能信

受。』當知是人則為得罪。是人復言：『如是經律我當受持。何以故？當為我作知足少欲、斷除煩惱、智慧涅槃、善法因故。』如是說者，非我弟子。

「若有說言：『如來為欲度眾生故，說方等經。』當知是人真我弟子。若有不受方等經者，當知是人非我弟子。不為佛法而出家也，即是邪見外道弟子。如是經律，是佛所說；若不如是，是魔所說。若有隨順魔所說者，是魔眷屬；若有隨順佛所說者，即是菩薩。

「復次，善男子，若有說言：『如來不為無量功德之所成就，無常變異。以得空法，宣說無我，不順世間。』如是經律名魔所說。若有人言：『如來正覺不可思議，亦為無量阿僧祇等功德所成。是故常住，無有變異。』如是經律是佛所說。若有隨順魔所說者，是魔眷屬；若有隨順佛所說者，即是菩薩。

「復有人言：『或有比丘，實不毀犯波羅夷罪。眾人皆謂犯波羅夷，如斷多羅樹。』而是比丘，實無所犯。何以故？我常說言：『四波羅夷若犯一者，猶如析石，不可還合。』若有自說得過人法，是則名為犯波羅夷。何以故？實無所得，

詐現得相故，如是之人，退失人法，是名波羅夷。

「所謂若有比丘，少欲知足，持戒清淨，住空閑處。若王、大臣見是比丘，生心念言謂得羅漢，即前讚歎、恭敬、禮拜。復作是言：『如是大師，捨是身已，當得阿耨多羅三藐三菩提。』比丘聞已，即白王言：『我實未得沙門道果，王莫稱我已得道果。惟願大王，勿為我說不知足法。不知足者，乃至謂得阿耨多羅三藐三菩提皆默然受。我今若當默然受者，當為諸佛之所呵責。知足之行，諸佛所讚。是故，我欲終身歡樂奉修知足。又，知足者，我定自知未得道果，王稱我得，我今不受，故名知足。』時，王答言：『大師實得阿羅漢果，如佛無異。』爾時，其王普皆宣告內外人民、中宮妃后，悉令皆知得沙門果。是故，咸令一切聞者，心生敬信，供養尊重。如是比丘，真是梵行清淨之人，以是因緣，普令諸人得大福德。而是比丘實不毀犯波羅夷罪。何以故？前人自生歡喜之心讚歎供養故，如是比丘當有何罪？若有說言是人得罪，當知是經是魔所說。

「復有比丘，說佛祕藏甚深經典：『一切眾生皆有佛性，以是性故，斷無量億諸煩惱結，即

得成阿耨多羅三藐三菩提⁹，除一闍提。』若王、大臣作如是言：『比丘！汝當作佛、不作佛耶？有佛性不？』比丘答言：『我今身中，定有佛性，成與¹⁰不成，未能審之。』王言：『大德！如其不作一闍提者，必成無疑。』比丘言：『爾！實如王言。』是人雖言定有佛性，亦復不犯波羅夷罪。復有比丘，即出家時，作是思惟：『我今必定成阿耨多羅三藐三菩提。』如是之人，雖未得成無上道果，已為得福無量無邊不可稱計。假使有人當言：『是人犯波羅夷！』一切比丘無不犯者。何以故？我於往昔八十億劫，常離一切不淨之物，少欲知足，威儀成就，善修如來無上法藏，亦自定知身有佛性。是故，我今得成阿耨多羅三藐三菩提，得名為佛，有大慈悲。如是經律是佛所說。若有不能隨順是者，是魔眷屬；若能隨順，是大菩薩。

「復有說言：『無四波羅夷、十三僧殘、二不定法、三十捨墮、九十一墮法¹¹、四懺悔法、眾多學法、七滅爭¹²等，無偷蘭遮、五逆等罪及一闍提。若有比丘犯如是等墮地獄者，外道之人

⁹ 大正藏：即得成於阿耨多羅三藐三菩提

¹⁰ 大正藏：以；永樂北藏及龍藏：與

¹¹ 大正藏：九十一墮；永樂北藏及龍藏：九十一墮法

¹² 大正藏：誑

悉應生天。何以故？諸外道等無戒可犯，此是如來，示現怖人，故說斯戒。』若言佛說：『我諸比丘，若欲行婬，應捨法服，著俗衣裳，然後行婬，復應生念：「婬欲因緣，非我過咎。」如來在世，亦有比丘，習行婬欲，得正解脫，或命終後，生於天上。古今有之，非獨我作。或犯四重，或犯五戒，或行一切不淨律儀，猶故得具真正解脫。如來雖說，犯突吉羅如忉利天日月歲數八百萬歲墮在地獄，是亦如來，示現怖人。』言波羅夷至突吉羅，輕重無差，是諸律師，妄作此言，言是佛制，必¹³定當知非佛所說。如是言說，是魔經律。

「若復說言：『於諸戒中，若犯小戒乃至細微，當受苦報，無有齊限。』如是知己，防護自身如龜藏六。若有律師復作是言：『凡所犯戒，都無罪報。』如是之人，不應親近。如佛所說：『若過一法，是名妄語，不見後世，無惡不造。』是故，不應親近是人。我佛法中清淨如是，況復有犯偷蘭遮罪，或犯僧殘及波羅夷而非罪耶？是故，應當深自防護如是等法。若不守護，更以何法名為禁戒？我於經中亦說有犯四波羅夷，乃至

¹³ 大正藏：畢

微細突吉羅等，應當苦治。眾生若不護持禁戒，云何當得見於佛性？一切眾生雖有佛性，要因持戒，然後乃見；因見佛性，得成阿耨多羅三藐三菩提。九部經中，無方等經，是故不說有佛性耳。經雖不說，當知實有。若作是說，當知是人真我弟子。」

迦葉菩薩白佛言：「世尊！如上所說一切眾生有佛性者，九部經中，所未曾聞。如其說有，云何不犯波羅夷耶？」

佛言：「善男子，如汝所說，實不毀犯波羅夷罪。善男子，譬如有人，說言大海唯有七寶，無八種者，是人無罪。若有說言九部經中無佛性者，亦復無罪。何以故？我於大乘大智海中說有佛性，二乘之人所不知見，佛¹⁴故說無，無有罪也。如是境界諸佛所知，非是聲聞、緣覺所及。

「善男子，若人不聞如來甚深祕密藏者，云何當知有佛性耶？何等名為祕密之藏？所謂方等大乘經典。

「善男子，有諸外道，或說我常，或說我斷。如來不爾，亦說有我，亦說無我，是名中道。若有說言：『佛說中道，一切眾生悉有佛性，煩惱

¹⁴ 大正藏：是

覆故，不知不見。是故，應當勤修方便，斷壞煩惱。』若有能作如是說者，當知是人犯四重；若有不作如是說者，是則名為犯波羅夷。若有說言：『我已成就阿耨多羅三藐三菩提。何以故？以有佛性故。有佛性者，必定當成阿耨多羅三藐三菩提。以是因緣，我今已得成就菩提。』當知是人則名為犯波羅夷罪。何以故？雖有佛性，以未修習諸善方便，是故未見；以未見故，不能得成阿耨多羅三藐三菩提。善男子，以是義故，佛法甚深不可思議。」

迦葉菩薩白佛言：「世尊！有王問言：『云何比丘墮過人法？』」

佛告迦葉：「若有比丘，為利養故，為飲食故，作諸諛諂、邪¹⁵偽、欺詐。『云何當令諸世間人定實知我是真乞士？以是因緣，令我大得利養、名譽。』如是比丘多愚癡故，長夜常念：『我實未得四沙門果，云何當令諸世間人謂我已得？復當云何令諸優婆塞、優婆夷等咸共指我，作如是言：「是人福德，真是聖人。」』如是思惟，專為求利，非為求法，行來出入，進止安庠¹⁶，執持衣鉢，

¹⁵ 大正藏：姦

¹⁶ 大正藏：詳

不失威儀，獨坐空處如阿羅漢，令世間人咸作是言：『如是比丘，善好第一，精勤苦行，修寂滅法。』『以是因緣，我當大得門徒弟子，諸人亦當大致供養衣服、飲食、卧具、醫藥，令多女人敬念愛重。』若有比丘及比丘尼作如是事，墮過人法。

「復有比丘，為欲建立無上正法，住空閑處，非阿羅漢而欲令人謂是羅漢、是好比丘、是善比丘、寂靜比丘，令無量人，生於信心。『以此因緣，我得無量諸比丘等以為眷屬，因是得教破戒比丘及優婆塞，悉令持戒。以是因緣，建立正法，光揚如來無上大義，開顯方等大乘法化，度脫一切無量眾生，善解如來所說經律輕重之義。』復言：『我今亦有佛性。有經名曰如來祕藏，於是經中，我當必定得成佛道，能盡無量億煩惱結。』廣為無量諸優婆塞說言：『汝等盡有佛性，我與汝等俱當安住如來道地，成阿耨多羅三藐三菩提，盡無量億諸煩惱結。』作是說者，是人不知墮過人法，名為菩薩。

「若言有犯突吉羅者，忉利天上日月歲數八百萬歲墮地獄中，受諸罪報。何況故犯偷蘭遮罪？此大乘中，若有比丘犯偷蘭遮，不應親近。何等

名為大乘經中偷蘭遮罪？若有長者，造立佛寺，以諸華鬘，用供養佛。有比丘見華貫中縷，不問輒取，名偷蘭遮。若知不知，亦如是犯。若以貪心破壞佛塔，犯偷蘭遮。如是之人，不應親近。若王、大臣見塔朽故，為欲修補，供養舍利，於是塔中，或得珍寶，即寄比丘。比丘得已，自在而用，如是比丘，名為不淨，多起鬪爭¹⁷。善優婆塞不應親近、供養、恭敬。如是比丘，名為無根，名為二根，名不定根。不定根者，欲貪女時，身即為女；欲貪男時，身即為男。如是比丘名為惡根，不名為男，不名為女，不名出家，不名在家。如是比丘不應親近、供養、恭敬。

「於佛法中沙門法者，應生悲心，覆育眾生，乃至蟻子，應施無畏，是沙門法；遠離飲酒，乃至嗅香，是沙門法；不得妄語，乃至夢中，不念妄語，是沙門法；不生欲心，乃至夢中亦復如是，是沙門法。」

迦葉菩薩白佛言：「世尊！若有比丘，夢行婬欲，是犯戒不？」

佛言：「不也。應於婬欲生臭穢想，乃至不生一念淨想，遠離女人、煩惱、愛想。若夢行婬，

¹⁷ 大正藏：諍

寤應生悔。比丘乞食受供養時，應如饑世食子肉想。若生婬欲，應疾捨離。如是法門，當知是佛所說經律。若有隨順魔所說者，是魔眷屬；若能隨順佛所說者，是名菩薩。

「若有說言：『常翹一脚¹⁸，寂默不言，投淵赴火，自墜高巖，不避險難，服毒斷食，卧灰土上，自縛手足，殺害眾生，方道呪術，旃陀羅子，無根、二根及不定根，身根不具，如是等輩¹⁹，如來悉聽出家為道。』是名魔說。

「佛先聽食五種牛味及以油蜜，憍奢耶衣、革屣等物。除是之外，若有說言：『聽著摩訶楞伽，一切種子悉聽貯畜，草木之屬皆有壽命。佛說是已便入涅槃。』若有經律作是說者，當知即是魔之所說。

「我亦不聽常翹一脚，若為法故，聽行、住、坐、卧。又亦不聽服毒、斷食、五熱炙身、繫縛手足、殺害眾生、方道呪術、珂貝象牙以為革屣、儲畜種子、草木有命、著摩訶楞伽。若言：『世尊作如是說。』當知是為外道眷屬，非我弟子。

「我唯聽食五種牛味及油蜜等，聽著革屣、

¹⁸ 大正藏：佛聽比丘常翹一脚

¹⁹ 大正藏：輩；永樂北藏及龍藏：事

憍奢耶衣。我說四大無有壽命。若有經律作是說者，是名佛說。若有隨順佛所說者，當知是等真我弟子；若有不隨佛所說者，是魔眷屬；若有隨順佛經律者，當知是人是大菩薩。

「善男子，魔說、佛說差別之相，今已為汝廣宣分別。」

迦葉白佛言：「世尊！我今始知魔說、佛說差別之相，因是得入佛法深義。」

佛讚迦葉：「善哉！善哉！善男子，汝能如是曉了分別，是名黠慧。」

四諦品第十²⁰

佛復告迦葉：「所言苦者，不名苦聖諦。何以故？若言苦是苦聖諦者，一切畜生及地獄眾生應有聖諦。」

「善男子，若復有人，不知如來甚深境界常住不變微密法身，謂是食身，非是法身；不知如來道德威力，是名為苦。何以故？以不知故，法見非法，非法見法，當知是人，必墮惡趣，輪轉生死，增長諸結，多受苦惱。若有能知如來常住，無有變異，或聞常住二字音聲，若一經耳，即生

²⁰ 大正藏：大般涅槃經四諦品第十

天上；後解脫時，乃能證知如來常住，無有變易。既證知已，而作是言：『我於往昔，曾聞是義，今得解脫，方乃證知。我於本際以不知故，輪轉生死，周迴無窮，始於今日，乃得真智。』若如是知，真是修苦，多所利益；若不知者，雖復勤修，無所利益。是名知苦，名苦聖諦。若人不能如是修習，是名為苦，非苦聖諦。

「苦集諦者，於真法中，不生真智，受不淨物，所謂奴婢，能以非法言是正法，斷滅正法不令久住。以是因緣，不知法性。以不知故，輪轉生死，多受苦惱，不得生天及正解脫。若有深智不壞正法，以是因緣，得生天上及正解脫。若有不知苦集諦處，而言：『正法無有常住，悉是滅法。』以是因緣，於無量劫流轉生死，受諸苦惱。若能知法常住不異，是名知集，名集聖諦。若人不能如是修習，是名為集，非集聖諦。

「苦滅諦者，若有多修習學空法，是為不善。何以故？滅一切法故，壞於如來真法藏故，作是修學，是名修空。修苦滅者，逆於一切諸外道等。若言修空是滅諦者，一切外道亦修空法，應有滅諦。若有說言：『有如來藏，雖不可見，若能滅除一切煩惱，爾乃得入。』若發此心，一念因緣，

於諸法中，而得自在。若有修習如來密藏無我、空寂，如是之人，於無量世，在生死中流轉受苦。若有不作如是修者，雖有煩惱，疾能滅除。何以故？因知如來祕密藏故，是名苦滅聖諦。若能如是修習滅者，是我弟子；若有不能作如是修，是名修空，非滅聖諦。

「道聖諦者，所謂佛、法、僧寶及正解脫。有諸眾生顛倒心，言：『無佛、法、僧及正解脫，生死流轉，猶如幻化。』修習是見，以此因緣，輪轉三有，久受大苦。若能發心，見於如來常住無變，法、僧解脫亦復如是。乘此一念，於無量世，自在果報，隨意而得。何以故？我於往昔，以四倒故，非法計法，受於無量惡業果報；我今已²¹滅如是見故，成佛正覺，是名道聖諦。若有人言：『三寶無常。』修習是見是虛妄修，非道聖諦。

若修是法為常住者，是我弟子。真見修習四聖諦法，是名四聖諦。」

迦葉菩薩白佛言：「世尊！我今始知修習甚深四聖諦法。」

²¹ 大正藏：已；永樂北藏及龍藏：以

四倒品第十一²²

佛復告迦葉²³：「謂四倒者²⁴，於非苦中生於苦想，名曰顛倒。非苦者，名為如來。生苦想者，謂諸如來無常變異。若說如來是無常者，名大罪苦。若言：『如來捨此苦身，入於涅槃，如薪盡火滅。』是名非苦而生苦想，是名顛倒。『我若說言如來常者，即是我見。以我見故，有無量罪。是故應說如來無常。如是說者，我則受樂。』如來無常，即為是苦。若是苦者，云何生樂？以於苦中生樂想故，名為顛倒。

「樂生苦想，名為顛倒。樂者，即是如來；苦者，如來無常。若說如來是無常者，是名樂中生於苦想。

「如來常住，是名為樂。『若我說言如來是常，云何復得入於涅槃？若言如來非是苦者，云何捨身而取滅度？』以於樂中生苦想故，名為顛倒。是名初倒。

「無常常想，常無常想，是名顛倒。無常者，名不修空。不修空故，壽命短促。若有說言不修

²² 大正藏：大般涅槃經四倒品第十一

²³ 大正藏：佛告迦葉

²⁴ 大正藏：善男子，謂四倒者

空寂得長壽者，是名顛倒。是名第二顛倒。

「無我我想，我無我想，是名顛倒。世間之人，亦說有我；佛法之中，亦說有我。世間之人雖說有我，無有佛性，是則名為於無我中而生我想，是名顛倒。佛法有我即是佛性，世間之人說佛法無我，是名我中生無我想。若言：『佛法必定無我，是故如來勅諸弟子修習無我。』名為顛倒。是名第三顛倒。

「淨不淨想，不淨淨想，是名顛倒。淨者即是如來常住，非雜食身，非煩惱身，非是肉身，非是筋骨繫縛之身。若有說言『如來無常，是雜食身，乃至筋骨繫縛之身，法、僧解脫是滅盡』者，是名顛倒。不淨淨想，名顛倒者，若有說言：『我此身中，無有一法是不淨者，以無不淨定當得入清淨之處，如來所說修不淨觀，如是之言，是虛妄說。』是名顛倒。是則名為第四顛倒。」

迦葉菩薩白佛言：「世尊！我從今日始得正見。世尊！自是之前，我等悉名邪見之人。」

大般涅槃經卷第七

大般涅槃經卷第八

北涼天竺三藏曇無讖譯 梵

宋沙門慧嚴慧觀同謝靈運再治

如來性起品第十二²⁵

迦葉白佛言：「世尊！二十五有，有我不耶²⁶？」

佛言：「善男子，我者，即是如來藏義。一切眾生悉有佛性，即是我義。如是我義，從本已來，常為無量煩惱所覆，是故眾生不能得見。

「善男子，如貧女人，舍內多有真金之藏，家人大小無有知者。時，有異人善知方便，語貧女言：『我今雇汝，汝可為我耘除草穢。』女人²⁷答言：『我今不能。汝若能示我子金藏，然後乃當速為汝作。』是人答²⁸言：『我知方便，能示汝子。』女人復²⁹言：『我家大小尚自不知，況汝能知？』是人答³⁰言：『我今審能。』女人復³¹言：『我亦欲見，并可示我。』是人即於其家掘出金藏。女人

²⁵ 大正藏：如來性品第十二

²⁶ 大正藏：耶；永樂北藏及龍藏：邪

²⁷ 大正藏：即；永樂北藏及龍藏：人

²⁸ 大正藏：復；永樂北藏及龍藏：答

²⁹ 大正藏：答；永樂北藏及龍藏：復

³⁰ 大正藏：復；永樂北藏及龍藏：答

³¹ 大正藏：答；永樂北藏及龍藏：復

見已，心生歡喜，起³²奇特想，宗仰是人。

「善男子，眾生佛性亦復如是，一切眾生不能得見，如彼寶藏，貧人不知。善男子，我今普示一切眾生所有佛性，為諸煩惱之所覆蔽，如彼貧人有真金藏不能得見。如來今日普示眾生諸覺寶藏，所謂佛性。一切眾生見是事已，心生歡喜，歸仰如來。善方便者，即是如來；貧女人者，即是一切無量眾生；真金藏者，即佛性也。

「復次，善男子，譬如女人，生育一子，嬰孩得病，是女愁惱，求覓良醫。良醫既至，合三種藥酥、乳、石蜜，與之令服。因告女人：『兒服藥已，且莫與乳。須藥消已，爾乃與之。』是時，女人即以苦味用塗其乳，語其兒言：『我乳毒塗，不可復觸。』其³³兒渴乏，欲得母乳，聞乳毒氣，便遠捨去。至其藥消，母乃洗乳，喚子與之。是時，小兒雖復飢渴，先聞毒氣，是故不來。母復語言：『為汝服藥，故以毒塗。汝藥已消，我已洗竟，汝便可來飲乳無苦。』其兒聞已，漸漸還飲。

「善男子，如來亦爾，為度一切，教諸眾生

³² 大正藏：生；永樂北藏及龍藏：起

³³ 大正藏：小；永樂北藏及龍藏：其

修無我法。如是修已，永斷我心，入於涅槃。為除世間諸妄見故，示現出過世間法故，復示世間計我虛妄非真實故，修無我法清淨身故。譬如女人，為其子故，以苦味塗乳。如來亦爾，為修空故，說言諸法悉無有我。如彼女人，淨洗乳已，而喚其子，欲令還飲³⁴。我今亦爾，說如來藏。是故，比丘不應生怖。如彼小兒，聞母喚已，漸還飲乳；比丘亦爾，應自分別如來祕藏，不得不有。」

迦葉菩薩白佛言：「世尊！實無有我。何以故？嬰兒生時，無所知曉。若有我者，即生之日，尋應有知。以是義故，定知無我。若定有我，受生已後，應無終沒。若使一切皆有佛性，是常住者，應無壞相。若無壞相，云何而有刹利、婆羅門、毗舍、首陀，及旃陀羅、畜生差別？今見業緣種種不同，諸趣各異。若定有我，一切眾生應無勝負。以是義故，定知佛性非是常法。若言佛性定是常者，何緣復說有殺、盜、婬、兩舌、惡口、妄言、綺語、貪、恚、邪見？若我性常，何故酒後荒醉迷亂？若我性常，盲應見色，聾應聞聲，瘖應能語，拘躄能行。若我性常，不應避於

³⁴ 大正藏：服；永樂北藏及龍藏：飲

火坑、大水、毒藥、刀劍、惡人、禽獸。若我常者，本所更事不應忘失。若不忘失，何緣復言：『我曾何處見是人耶？』若我常者，則不應有老少盛衰、憶念往事。若我常者，止住何處？為在涕唾青、黃、赤、白諸色中耶？若我常者，應遍身中，如胡麻油間無空處。若斷身時，我亦應斷。」

佛告迦葉：「善男子，譬如王家有大力士，其人眉間有金剛珠，與餘力士角³⁵力相撲，而彼力士以頭觸之，其額上珠尋沒膚中，都不自知是珠所在。其處有瘡，即命良醫欲自療治。時有明醫，善知方藥，即知是瘡因珠入體，是珠入皮即便停住。是時，良醫尋問力士：『卿額上珠為何所在？』力士驚答：『大師醫王，我額上珠乃失³⁶去耶？是珠今者，為何所在？將非幻化？』憂愁啼哭。是時，良醫慰喻力士：『汝今不應生大愁苦。汝因鬪時，寶珠入體，今在皮裏，影現於外。汝等鬪時，瞋恚毒盛，珠陷入體，故不自知。』是時，力士不信醫言：『若在皮裏，膿血不淨，何緣不出？若在筋裏，不應可見。汝今云何欺誑於我？』時，醫執鏡以照其面，珠在鏡中明了顯

³⁵ 大正藏：掬；永樂北藏及龍藏：角

³⁶ 大正藏：失；永樂北藏及龍藏：無

現。力士見已，心懷驚怪，生奇特想。

「善男子，一切眾生亦復如是，不能親近善知識故，雖有佛性皆不能見，而為貪、婬、瞋恚、愚癡之所覆蔽，故墮地獄、畜生、餓鬼、阿脩羅、旃陀羅、刹利、婆羅門、毗舍、首陀，生如是等種種家中。因心所起種種業緣，雖受人身，聾盲瘖瘂，拘躄癱跛，於二十五有受諸果報，貪婬、瞋恚、愚癡覆心，不知佛性。如彼力士，寶珠在體，謂呼失去。眾生亦爾，不知親近善知識故，不識如來微密寶藏，修學無我。譬如非聖，雖說有我，亦復不知我之真性。我諸弟子亦復如是，不知親近善知識故，修學無我，亦復不知無我之處。尚自不知無我真性，況復能知有我真性？」

「善男子，如來如是說諸眾生皆有佛性，譬如良醫示彼力士金剛寶珠。是諸眾生，為無量億諸煩惱等之所覆蔽，不識佛性。若盡煩惱，爾時，乃得證知明了，如彼力士，於明鏡中，見其寶珠³⁷。善男子，如來祕藏如是無量不可思議。

「復次，善男子，譬如雪山，有一味藥，名曰樂味，其味極甜，在深叢下，人無能見。有人聞香，即知其地當有是藥。過去世中，有轉輪王，

³⁷ 大正藏：於明鏡中見其寶珠；永樂北藏及龍藏：於淨鏡中見其寶後

於彼雪山為此藥故，在在處處，造作木筩，以接是藥。是藥熟時，從地流出，集木筩中，其味真正。王既沒已，其後是藥，或醋、或鹹、或甜、或苦、或辛、或淡。如是一味，隨其流處，有種種異，是藥真味，停留在山，猶如滿月，凡人薄福，雖以掘鑿加功苦至而不能得。復有聖王，出現於世，以福因緣，即得是藥真正之味。

「善男子，如來祕藏，其味亦爾，為諸煩惱叢林所覆，無明眾生，不能得見。藥一味者³⁸，譬如佛性，以煩惱故，出種種味，所謂地獄、畜生、餓鬼、天、人、男女、非男非女、刹利、婆羅門、毗舍、首陀。佛性雄猛，難可毀壞，是故無有能殺害者。若有殺者，則斷佛性，如是佛性終不可斷。性若可斷，無有是處。如我性者，即是如來祕密之藏。如是祕藏，一切無能毀壞燒滅。雖不可壞，然不可見，若得成就阿耨多羅三藐三菩提，爾乃證知。以是因緣，無能殺者。」

迦葉菩薩復白佛言：「世尊！若無殺者，應當無有不善之業。」

佛告迦葉：「實有殺生。何以故？善男子，眾生佛性住五陰中，若壞五陰，名曰殺生。若有

³⁸ 大正藏：藥一味者；永樂北藏及龍藏：一味者

殺生即墮惡趣，以業因緣，而有刹利、婆羅門等、毗舍、首陀、及旃陀羅、若男若女、非男非女，二十五有差別之相，流轉生死。非聖之人，橫計於我，大小諸相猶如稗子，或如米豆，乃至拇³⁹指，如是種種妄生憶想，妄想之相無有真實。出世我相名為佛性，如是計我，是名最善。

「復次，善男子，譬如有人，善知伏藏，即取利鑿，掘地直下。磐石沙礫，直過無難；唯至金剛，不能穿徹。夫金剛者，所有刀斧不能破壞。善男子，眾生佛性亦復如是，一切論者、天魔波旬及諸人天，所不能壞。五陰之相即是起作，起作之相，猶如石沙，可穿可壞。佛性真我，譬如金剛，不可毀壞。以是義故，壞五陰者，名為殺生。善男子，必定當知佛法如是不可思議。

「善男子，方等經者，猶如甘露，亦如毒藥。」

迦葉菩薩復白佛言：「如來何緣說方等經，譬如甘露，亦如毒藥？」

佛言：「善男子，汝今欲知如來祕藏真實義不？」

迦葉白言：「我今實欲得知如來祕藏之義。」

爾時，世尊而說偈言：

³⁹ 大正藏：母；永樂北藏及龍藏：拇

或有服甘露 傷命而早夭
或復服甘露 壽命得長存
或有服毒生 有緣服毒死
無閼⁴⁰智甘露 所謂大乘典
如是大乘典 亦名雜毒藥
如酥醍醐等 及以諸石蜜
服消則為藥 不消則為毒
方等亦如是 智者為甘露
愚不知佛性 服之則成毒
聲聞及緣覺 大乘為甘露
猶如諸味中 乳最為第一
如是懃進者 依因於大乘
得至於涅槃 成人中象王
眾生知佛性 猶如迦葉等
無上甘露味 不生亦不死
迦葉汝今當 善分別三歸
如是三歸性 則是我之性
若能諦觀察 我性有佛性
當知如是人 得入祕密藏
知我及我所 是人已出世
佛法三寶性 無上第一尊

⁴⁰ 大正藏：礙；永樂北藏及龍藏：閼

如我所說偈 其性義如是

爾時，迦葉復說偈言：

我今都不知 歸依三寶處
云何當歸趣 無上無所畏
不知三寶處 云何作無我
云何歸佛者 而得於安慰
云何歸依法 惟願為我說
云何得自在 云何不自在
云何歸依僧 轉得無上利
云何真實說 未來成佛道
未來若不成 云何歸三寶
我今無預知 當行次第依
云何未懷妊 而作生子想
若必在胎中 則名為有子
子若在胎中 定當生不久
是名為子義 眾生業亦然
如佛之所說 愚者不能知
以其不知故 輪迴生死獄
假名優婆塞 不知真實義
惟願廣分別 除斷我疑網
如來大智慧 唯垂哀分別
願說於如來 祕密之寶藏

迦葉汝當知 我今當為汝
善開微密藏 令汝疑得斷
今當至心聽 汝於諸菩薩
則與第七佛 同其一名號
歸依於佛者 真名優婆塞
終不更歸依 其餘諸天神
歸依於法者 則離於殺害
歸依聖僧者 不求於外道
如是歸三寶 則得無所畏
迦葉白佛言 我亦歸三寶
是名為正路 諸佛之境界
三寶平等相 常有大智性
我性及佛性 無二無差別
是道佛所讚 正進安止處
亦名正遍見 故為佛所稱
我亦趣善逝 所讚無上道
是最為甘露 諸有所無有

爾時，佛告迦葉菩薩：「善男子，汝今不應如諸聲聞、凡夫之人分別三寶，於此大乘無有三歸分別之相。所以者何？於佛性中即有法、僧，為欲化度聲聞凡夫故，分別說三寶異相。善男子，若欲隨順世間法者，則應分別有三歸依。」

「善男子，菩薩應作如是思惟：『我今此身歸依於佛。若即此身得成佛道，既成佛已，不當恭敬、禮拜、供養於諸世尊。何以故？諸佛平等，等為眾生作歸依故。若欲尊重法身舍利，便應禮敬諸佛塔廟。所以者何？為欲化度諸眾生故，亦令眾生於我身中起塔廟想，禮拜供養。如是，眾生以我法身為歸依處。一切眾生皆依非真邪偽之法，我當次第為說真法；又有歸依非真僧者，我當為作依真僧處；若有分別三歸依者，我當為作一歸依處，無三差別；於生盲眾為作眼目；復當為諸聲聞、緣覺作真歸處。』善男子，如是，菩薩為無量惡諸眾生等及諸智者而作佛事。

「善男子，譬如有人，臨陣戰時，即生心念：『我於是中，最為第一；一切兵眾，悉依恃我。』亦如太⁴¹子如是思惟：『我當調伏其餘王子，紹繼大王帝王之業而得自在，令諸王子悉見歸依。』是故，不應生下劣心。如王，王子、大臣亦爾。善男子，菩薩摩訶薩亦復如是，作是思惟：『云何三事與我一體？』善男子，我示三事，即是涅槃。如來者，名無上士，譬如人身，頭最為上，

⁴¹ 大正藏：大；永樂北藏及龍藏：太

非餘肢⁴²節、手、足等也。佛亦如是，最為尊上，非法、僧也。為欲化度諸世間故，種種示現差別之相，如彼梯墜⁴³。是故，汝今不應受持如凡愚人所知三歸差別之相，汝於大乘，猛利決斷，應如剛刀。」

迦葉菩薩白佛言：「世尊！我知故問，非為不知。我為菩薩大勇猛者，問於無垢清淨行處，欲令如來為諸菩薩廣宣分別奇特之事，稱揚大乘方等經典。如來大悲今已善說，我亦如是安住其中所說菩薩清淨行處，即是宣說《大涅槃經》。世尊！我今亦當廣為眾生，顯揚如是如來祕藏，亦當證知真三歸處。若有眾生，能信如是《大涅槃經》，其人則能自然了達三歸依處。何以故？如來祕藏有佛性故。其有宣說是經典者，皆言身中盡有佛性，如是之人，則不遠求三歸依處。何以故？於未來世，我身即當成就三寶。是故，聲聞、緣覺之人及餘眾生，皆依於我，恭敬禮拜。」

「善男子，以是義故，應當正學大乘經典。」

迦葉復言：「佛性如是不可思議，三十二相、八十種好亦不可思議。」

⁴² 大正藏：支；永樂北藏及龍藏：肢

⁴³ 大正藏：橙；永樂北藏及龍藏：墜

爾時，佛讚迦葉菩薩：「善哉！善哉！善男子，汝已成就深利智慧，我今當更善為汝說入如來藏。

「若我住者，即是常法，不離於苦；若無我者，修行淨行無所利益。若言諸法皆無有我，是即斷見；若言我住，即是常見。若言一切行無常者，即是斷見；諸行常者，復是常見。若言苦⁴⁴者，即是斷見；若言樂者，復是常見。修一切法常者，墮於斷見；修一切法斷者，墮於常見。如步屈蟲，要因前脚得移後足；修常、斷者亦復如是，要因斷、常。以是義故，修餘法苦者，皆名不善；修餘法樂者，則名為善。修餘法無我者，是諸煩惱分；修餘法常者，是則名曰如來祕藏，所謂涅槃無有窟宅。修餘無常法者，即是財物；修餘常法者，謂佛、法、僧及正解脫。當知如是佛法中道，遠離二邊而說真法。凡夫愚人於中無疑，如羸病人服食酥已，氣力輕便。有無之法，體性不定。譬如四大，其性不同，各自違反，良醫善知，隨其偏發而消息之。善男子，如來亦爾，於諸眾生猶如良醫，知諸煩惱體相差別而為除斷，開示如來祕密之藏，清淨佛性常住不變。

⁴⁴ 大正藏：苦；永樂北藏：苦；龍藏：若

「若言有者，智不應染；若言無者，即是妄語。若言有者，不應默然，亦復不應戲論諍訟，但求了知諸法真性。凡夫之人，戲論諍訟，不解如來微密藏故。若說於苦，愚人便謂：『身是無常。』說一切苦，復不能知身有樂性。說無常者，凡夫之人計一切身皆是無常，譬如瓦坏。有智之人應當分別，不應盡言一切無常。何以故？我身即有佛性種子。若說無我，凡夫當謂：『一切佛法悉無有我。』智者應當分別無我假名不實，如是知已，不應生疑。若言如來祕藏空寂，凡夫聞之生斷滅見；有智之人應當分別如來是常，無有變易。若言解脫譬如幻化，凡夫當謂：『得解脫者⁴⁵即是磨滅。』有智之人，應當分別，人中師子雖有去來，常住無變。若言無明因緣諸行，凡夫之人聞已，分別生二法想，明與無明；智者了達其性無二，無二之性即是實性。若言諸行因緣識者，凡夫謂二，行之與識；智者了達其性無二，無二之性即是實性。若言十善十惡可作不可作，善道惡道，白法黑法，凡夫謂二；智者了達其性無二，無二之性即是實性。若言應修一切法苦，凡夫謂二；智者了達其性無二，無二之性即是實

⁴⁵ 大正藏：得真解脫；永樂北藏及龍藏：得解脫者

性。若言一切行無常者⁴⁶，如來祕藏亦是無常，凡夫謂二；智者了達其性無二，無二之性即是實性。若言一切法無我，如來祕藏亦無有我，凡夫謂二；智者了達其性無二，無二之性即是實性。我與無我，性無有二，如來祕藏其義如是。不可稱計無量無邊諸佛所讚，我今於是一切功德成就，經中皆悉說已。

「善男子，我與無我，性相無二，汝應如是受持頂戴。

「善男子，汝亦應當堅持憶念如是經典，如我先於《摩訶般若波羅蜜經》中說：『我、無我，無有二相。』如因乳生酪，因酪得生酥，因生酥得熟酥，因熟酥得醍醐，如是酪性，為從乳生？為從自生？從他生耶？乃至醍醐亦復如是。若從他生，即是他作，非是乳生；若非乳生，乳無所為。若自生者，不應相似相續而生；若相續生則不俱生；若不俱生，五種之味則不一時；雖不一時，定復不從餘處來也。當知乳中先有酪相，甘味多故，不能自變；乃至醍醐亦復如是。是牛食啖⁴⁷水草因緣，血脈轉變而得成乳。若食甘草，

⁴⁶ 大正藏：若言一切行無常者；永樂北藏及龍藏：若言一切行無常

⁴⁷ 大正藏：噉

其乳則甜；若食苦草，乳則苦味。雪山有草，名曰肥膩，牛若食者，純得醍醐，無有青、黃、赤、白、黑色。穀草因緣，其乳則有色味之異。是諸眾生以明、無明業因緣故，生於二相，若無明轉，則變為明。一切諸法善、不善等，亦復如是，無有二相。」

迦葉菩薩白佛言：「世尊！如佛所說乳中有酪，是義云何？世尊！若言乳中定有酪相，以微細故不可見者，云何說言從乳因緣而生於酪？法若本無，則名為生；如其已有，云何言生？若言乳中定有酪相，百草之中亦應有乳，如是乳中亦應有草。若言乳中定無酪者，云何因乳而得生酪？若法本無而後生者，何故乳中不生於草？」

「善男子，不可定言乳中有酪、乳中無酪，亦不可說從他而生。若言乳中定有酪者，云何而得體味各異？是故，不可說言乳中定有酪性。若言乳中定無酪者，乳中何故不生兔角？置毒乳中，酪則殺人。是故，不可說言乳中定無酪性。若言是酪從他生者，何故水中不生於酪？是故，不可說言酪從他生。善男子，是牛食啖草因緣故，血則變白；草血滅已，眾生福力變而成乳。是乳雖從草血而出，不得言二，唯得名為從因緣生，酪

至醍醐亦復如是。以是義故，得名牛味。是乳滅已，因緣成酪。何等因緣？若酵若煖⁴⁸，是故得名從因緣有，乃至醍醐亦復如是。是故，不得定言乳中無有酪相、從他生者，離乳而有，無有是處。

「善男子，明與無明，亦復如是。若與煩惱諸結俱者，名為無明；若與一切善法俱者，名之為明。是故，我言無有二相。以是因緣，我先⁴⁹說言：『雪山有草，名曰肥膩，牛若食者，即成醍醐。』佛性亦爾。善男子，眾生薄福，不見是草；佛性亦爾，煩惱覆故，眾生不見。譬如大海，雖同一鹹，其中亦有上妙之水，味同於乳。譬如雪山，雖復成就種種功德，多生諸藥，亦有毒草。諸眾生身亦復如是，雖有四大毒蛇之種，其中亦有妙藥大王，所謂佛性，非是作法，但為煩惱客塵所覆。若剎利、婆羅門、毗舍、首陀能斷除者，即見佛性，成無上道。

「譬如虛空，震雷起雲，一切象牙上皆生華。若無雷震，華則不生，亦無名字。眾生佛性亦復如是，常為一切煩惱所覆，不可得見。是故，我

⁴⁸ 大正藏：若酢若煖；永樂北藏及龍藏：若酵若煖

⁴⁹ 大正藏：先；永樂北藏及龍藏：上

說眾生無我。若得聞是大般涅槃微妙經典，則見佛性如象牙華。雖聞契經一切三昧，不聞是經，不知如來微妙之相，如無雷時，象牙上華不可得見。聞是經已，即知一切如來所說祕藏佛性，譬如天雷見象牙華。聞是經已，即知一切無量眾生皆有佛性。以是義故，說《大涅槃》名為如來祕密之藏。增長法身，猶如雷時，象牙上華。以能長養如是大義故，得名為『大般涅槃』。若有善男子、善女人，有能習學是大涅槃微妙經典，當知是人，能報佛恩，真佛弟子。」

迦葉菩薩白佛言：「甚奇！世尊！所言佛性甚深甚深，難見難入，聲聞、緣覺所不能解⁵⁰。」

佛言：「善男子，如是如是，如汝所歎，不違我說。」

迦葉菩薩白佛言：「世尊！佛性者，云何甚深難見難入？」

佛言：「善男子，如百盲人，為治目故，造詣良醫。是時，良醫即以金錐抉⁵¹其眼膜⁵²，以一指示問言：『見不？』盲人答言：『我猶未見。』復以二指、三指示之，乃言：『少見。』善男子，

⁵⁰ 大正藏：解；永樂北藏及龍藏：報

⁵¹ 大正藏：決；永樂北藏及龍藏：抉

⁵² 大正藏：膜；永樂北藏及龍藏：膜

是大涅槃微妙經典，如來未說亦復如是，無量菩薩雖具足行諸波羅蜜乃至十住，猶未能見所有佛性，如來既說即便少見。是菩薩摩訶薩既得見已，咸作是言：『甚奇！世尊！我等流轉無量生死，常為無我之所惑亂。』善男子，如是菩薩位階十地，尚不明了知見佛性，何況聲聞、緣覺之人能得見耶？

「復次，善男子，譬如遠⁵³觀虛空鵝鴈，為是虛空？為是鵝鴈？諦觀不已，仿佛⁵⁴見之。十住菩薩於如來性知見少分亦復如是，況復聲聞、緣覺之人而能知見？

「善男子，譬如醉人，欲涉遠路，矇矓見道。十住菩薩，於如來性知見少分，亦復如是。

「善男子，譬如渴人，行於曠⁵⁵野，是人渴逼，遍行求水，見有叢樹，樹有白鶴。是人迷悶，不能分別是樹是水，諦觀不已，乃見白鶴及以叢樹。善男子，十住菩薩，於如來性知見少分，亦復如是。

「善男子，譬如有人，在大海中，乃至無量百千由旬遠望大舶、樓櫓、堂閣，即作是念：『彼

⁵³ 大正藏：仰；永樂北藏及龍藏：遠

⁵⁴ 大正藏：髣髴；永樂北藏及龍藏：仿佛

⁵⁵ 大正藏：曠

是樓櫓？為是虛空？』久視乃生必定之心，知是樓櫓。十住菩薩，於自身中見如來性，亦復如是。

「善男子，譬如王子，身極懦弱，通夜遊戲至明清旦，目視一切悉不明了。十住菩薩，雖於己身見如來性，亦復如是，不大明了。

「復次，善男子，譬如臣吏，王事所拘，逼夜還家，電明暫發，因見牛聚，即作是念：『為是牛群？為雲？為舍？』是人久視，雖生牛想，猶不審定。十住菩薩，雖於己身見如來性，未能審定亦復如是。

「復次，善男子，如持戒比丘，觀無蟲水而見蟲相，即作是念：『此中動者，為是蟲耶？是塵土耶？』久視不已，雖知是塵，亦不明了。十住菩薩，於己身中見如來性，亦復如是，不大明了。

「復次，善男子，譬如有人，於陰闇中遠見小兒，即作是念：『彼為是牛？為人？為鳥耶？』久視⁵⁶不已，雖見小兒，猶不明了。十住菩薩，於己身中見如來性，亦復如是，不大明了。

「復次，善男子，譬如有人，於夜闇中，見畫菩薩，即作是念：『是菩薩像、自在天像、大

⁵⁶ 大正藏：觀

梵天像成染衣耶？』是人久視⁵⁷，雖復意謂是菩薩像，亦不明了。十住菩薩，於己身中見如來性，亦復如是，不大明了。

「善男子，所有佛性如是甚深，難得知見，唯佛能知，非諸聲聞、緣覺所及。善男子，智者應作如是分別，知如來性。」

迦葉菩薩白佛言：「世尊！佛性如是微細難知，云何肉眼而能得見？」

佛告迦葉：「善男子，如非想非非想天亦非二乘所能得知，隨順契經，以信故知。」

「善男子，聲聞、緣覺信順如是《大涅槃經》，自知己身有如來性亦復如是。善男子，是故應當精勤修習《大涅槃經》。善男子，如是佛性唯佛能知，非諸聲聞、緣覺所及。」

迦葉菩薩白佛言：「世尊！非聖凡夫有眾生性，皆說有我。」

佛言：「譬如二人，共為親友，一是王子、一是貧賤。如是二人互相往反⁵⁸。是時，貧人見是王子有一好刀，淨妙第一，心中貪著。王子後時，執持是刀，逃至他國。貧人於後，寄宿他家，

⁵⁷ 大正藏：觀

⁵⁸ 大正藏：返

即於眠中寤言：『刀！刀！』旁⁵⁹人聞之，收至王所。時，王問言：『汝言刀者，可以示我。』是人具以上事答王：『王今設使屠割臣身，分裂手足，欲得刀者，實不可得。臣與王子素為親厚，先共一處，雖曾眼見，乃至不敢以手振觸，況當故取？』王復問言：『卿所見刀，相貌何類？』答言：『大王，臣⁶⁰所見者，如殺羊角。』王聞是已，欣然而笑，語言：『汝今隨意所至，莫生憂怖。我庫藏中，都無是刀，況汝乃於王子邊見？』時，王即問諸群臣言：『汝等曾見如是刀不？』言已便崩，尋立餘子紹繼王位，復問群臣：『汝等曾於官庫藏中，見是刀不？』諸臣答言：『臣等曾見。』又復問言：『其狀何似？』答言：『大王，如殺羊角。』王言：『我庫藏中，何緣當有如是相刀？』次第四王皆悉檢校⁶¹，求索不得。却後數時，先逃王子，從他國還歸其本土，復得為王。既登王位，復問諸臣：『汝見刀不？』答言：『大王，臣等皆見。』又復問言：『其狀何似？』答言：『大王，其色清淨如優鉢羅華。』復有答言：『形如羊角。』復有答言：『其色紅赤，猶如火聚。』復有答言：

⁵⁹ 大正藏：傍

⁶⁰ 大正藏：臣；永樂北藏及龍藏：我

⁶¹ 大正藏：檢校

『猶如黑蛇。』時，王大笑：『卿等皆悉不見我刀真實之相。』

「善男子，菩薩摩訶薩亦復如是，出現於世說我真相，說已捨去，譬如王子，持淨妙刀，逃至他國。凡夫愚人說言：『一切有我有我。』如彼貧人，止宿他舍，寢言：『刀！刀！』聲聞、緣覺問諸眾生：『我有何相？』答言：『我見我相大如拇⁶²指。』或言如米，或如稗子。有言：『我相住在心中，熾然如日。』如是眾生，不知我相，譬如諸臣，不知刀相。菩薩如是說於我法，凡夫不知種種分別，妄作我相，如問刀相，答似羊角。是諸凡夫，次第相續而起邪見，為斷如是諸邪見故，如來示現說於無我，譬如王子語諸臣言：『我庫藏中，無如是刀。』

「善男子，今日如來所說真我，名曰佛性，如是佛性，我佛法中，譬如淨刀。善男子，若有凡夫能善說者，即是隨順無上佛法。若有善能分別隨順宣說是者，當知即是菩薩相貌。」

⁶² 大正藏：母

文字品第十三⁶³

佛復告迦葉：「所有種種異論、呪術、言語、文字皆是佛說，非外道說。」

迦葉菩薩白佛言：「世尊！云何如來說字根本？」

佛言：「善男子，初說半字以為根本，持諸記論、呪術、文章、諸陰實法。凡夫之人學是字本，然後能知是法非法。」

迦葉菩薩復白佛言：「世尊！所言字者，其義云何？」

「善男子，有十四音名為字義。所言字者，名曰涅槃，常故不流；若不流者，則為無盡；夫無盡者，即是如來金剛之身。

「是十四音名曰字本。阿_短者⁶⁴，不破壞故；不破壞者，名曰三寶，譬⁶⁵如金剛。又復，阿者，不流故；不流者，即是如來。如來九孔無所流故，是故不流。又，無九孔，是故不流，不流即常，常即如來，如來無作，是故不流。又復阿者，名為功德；功德者，即是三寶，是故名阿。

⁶³ 大正藏：大般涅槃經文字品第十三

⁶⁴ 大正藏：短阿者；永樂北藏及龍藏：阿（短）者

⁶⁵ 大正藏：喻

「次阿^{長呼}者⁶⁶，名阿闍黎⁶⁷。阿闍黎者，義何謂耶？於世間中得名聖者。何謂為聖？聖名無著，少欲知足，亦名清淨，能度眾生於三有流生死大海，是名為聖。又復阿者，名曰制度，修持淨戒，隨順威儀。又復阿者，名依聖人，應學威儀進止舉動，供養、恭敬、禮拜三尊，孝養父母及學大乘。善男女等具持禁戒及諸菩薩摩訶薩等，是名聖人。又復阿者，名曰教誨，如言：『汝等⁶⁸如是應作，如是莫作。』若有能遮非威儀法，是名聖人，是故名阿。

「伊^{短呼}者⁶⁹，即是佛法，梵行廣大，清淨無垢，譬如滿月。汝等如是應作、不作，是義、非義，此是佛說、此是魔說，是故名伊。

「伊^{長呼}者⁷⁰，佛法微妙，甚深難得。如自在天、大梵天王，法名自在，若能持者，則名護法。又，自在者，名四護世。是四自在則能攝護《大涅槃經》，亦能自在敷揚宣說。又復伊者，能為眾生自在說法。復次，伊者為自在故說，何等是耶？所謂修習方等經典。復次，伊者為斷嫉妬，如除

⁶⁶ 大正藏：長阿者；永樂北藏及龍藏：阿（長呼）者

⁶⁷ 大正藏：梨

⁶⁸ 大正藏：等；永樂北藏及龍藏：來

⁶⁹ 大正藏：短伊者；永樂北藏及龍藏：伊（短呼）者

⁷⁰ 大正藏：長伊者；永樂北藏及龍藏：伊（長呼）者

稗穢，皆悉能令變成吉祥，是故名伊。

「憂^{短呼}者⁷¹，於諸經中最上、最勝、增長上上，謂大涅槃。復次，憂者，如來之性，聲聞、緣覺所未曾聞。如一切處，北鬱單越最為殊勝；菩薩若能聽受是經，得名最上最勝⁷²，是故名憂。

「憂^長者⁷³，譬如牛乳，諸味中上；如來之性，亦復如是，於諸經中最尊、最上。若有誹謗，當知是人，與牛無別。復次，憂者，是人名為無慧正念，誹謗如來微密祕藏，當知是人，甚可憐憫，遠離如來祕密之藏，說無我法，是故名憂。

「唵者，即是諸佛法性涅槃，是故名唵。

「鬘⁷⁴者，謂如來義。復次，鬘者，如來進止、屈伸⁷⁵、舉動無不利益一切眾生，是故名鬘。

「烏者，名煩惱義。煩惱者，名曰諸漏。如來永斷一切煩惱，是故名烏。

「炮者，謂大乘義，於十四音是究竟義。大乘經典亦復如是，於諸經論最為究竟，是故名炮。

「菴者，能遮一切諸不淨物，於佛法中能捨一切金銀寶物，是故名菴。

⁷¹ 大正藏：短憂者；永樂北藏及龍藏：憂（短呼）者

⁷² 大正藏：於一切眾最上最勝；永樂北藏及龍藏：得名最上最勝

⁷³ 大正藏：長憂者；永樂北藏及龍藏：憂（長）者

⁷⁴ 大正藏：野；永樂北藏及龍藏：野

⁷⁵ 大正藏：申；永樂北藏及龍藏：伸

「痾者，名勝乘義。何以故？此大乘典《大涅槃經》於諸經中最为殊勝，是故名痾^{安餓切}。

「迦者，於諸眾生起大慈悲，生於子想，如羅睺羅，作妙善義，是故名迦。

「呿者，名非善友。非善友者，名為雜穢。不信如來祕密之藏，是故名呿。

「伽者，名藏。藏者，即是如來祕藏。一切眾生皆有佛性，是故名伽。

「伽^{重音}者⁷⁶，如來常音。何等名為如來常音？所謂如來常住不變，是故名伽。

「俄者，一切諸行破壞之相，是故名俄。

「遮者，即是修義。調伏一切諸眾生故，名為修義，是故名遮。

「車者，如來覆蔭一切眾生，譬如大蓋，是故名車。

「闍者，是正解脫，無有老相，是故名闍。

「闍^{重音}者⁷⁷，煩惱繁茂，譬如稠林，是故名闍。

「若者，是智慧義，知真法性，是故名若。

「吒者，於闍浮提示現半身而演說法，譬如半月，是故名吒。

⁷⁶ 大正藏：重音伽者；永樂北藏及龍藏：伽（重音）者

⁷⁷ 大正藏：重音闍者；永樂北藏及龍藏：闍（重音）者

「佗者⁷⁸，法身具足，譬如滿月，是故名佗^{土家切}。

「茶者，是愚癡僧，不知常與無常，譬如小兒，是故名茶。

「茶^{重音}者⁷⁹，不知師恩，譬如羝羊，是故名茶。

「拏者⁸⁰，非是聖義，譬如外道，是故名拏。

「多者，如來於彼告諸比丘：『宜離驚畏，當為汝等說微妙法。』是故名多。

「他者，名愚癡義。眾生流轉生死，自纏如蠶蛄蜣⁸¹，是故名他。

「陀者，名曰大施，所謂大乘，是故名陀。

「陀^{重音}者⁸²，稱讚功德，所謂三寶如須彌山，高峻廣大，無有傾倒，是故名陀。

「那者，三寶安住，無有傾動，譬如門闌，是故名那。

「波者，名顛倒義。若言三寶悉皆滅盡，當知是人為自疑惑，是故名波。

「頗者，是世間災。若言世間災起之時，三寶亦盡。當知是人愚癡無智，違失聖旨，是故名頗。

⁷⁸ 大正藏：佗（土家反）者；永樂北藏及龍藏：佗者

⁷⁹ 大正藏：重音茶者；永樂北藏及龍藏：茶（重音）者

⁸⁰ 大正藏：拏

⁸¹ 大正藏：自纏如蠶

⁸² 大正藏：重音陀者；永樂北藏及龍藏：陀（重音）者

「婆者，名佛十力，是故名婆。

「婆_{重音}者⁸³，名為重擔。堪任荷負無上正法，當知是人是大菩薩，是故名婆。

「摩者，是諸菩薩嚴峻制度，所謂大乘大般涅槃，是故名摩。

「耶⁸⁴者，是諸菩薩，在在處處，為諸眾生說大乘法，是故名耶。

「囉者，能壞貪欲、瞋恚、愚癡，說真實法，是故說囉。

「羅_{輕音}者⁸⁵，名聲聞乘動轉不住。大乘安固⁸⁶，無有傾動，捨聲聞乘，精勤修習無上大乘，是故名羅。

「和者，如來世尊為諸眾生雨大法雨，所謂世間呪術經書，是故名和。

「賒者，遠離三箭，是故名賒。

「沙者，名具足義。若能聽是《大涅槃經》，則為已得聞持一切大乘經典，是故名沙。

「娑者，為諸眾生演說正法，令心歡喜，是故名娑。

「呵者，名心歡喜。『奇哉！世尊離一切行。』

⁸³ 大正藏：重音婆者；永樂北藏及龍藏：婆（重音）者

⁸⁴ 大正藏：邪

⁸⁵ 大正藏：輕羅者；永樂北藏及龍藏：羅（輕音）者

⁸⁶ 大正藏：隱

怪哉！如來入般涅槃。』是故名呵。

「羅者，名曰魔義。無量諸魔不能毀壞如來祕藏，是故名羅^{來家切}。復次，羅者，乃至示現隨順世間有父母妻子，是故名羅。

「魯、流、盧、樓，如是四字說有四義，謂佛、法、僧及以對法。言對法者，隨順世間，如提婆達示現壞僧，化作種種形貌色像，為制戒故。智者了達，不應於此而生畏怖，是名隨順世間之行。以是故，名魯、流、盧、樓。

「吸氣、舌根、隨鼻之聲，長短超聲，隨音解義，皆因舌齒而有差別。如是字義，能令眾生，口業清淨。眾生佛性則不如是假於文字然後清淨。何以故？性本淨故。雖復處在陰、界、入中，而亦不同陰、界、入也⁸⁷。是故，眾生悉應歸依。諸菩薩等以佛性故，等視眾生無有差別。是故半字於諸經書、記論、文章而為根本。又，半字義皆是煩惱言說之本，故名半字。滿字者，乃是一切善法言說之根本也。譬如世間為惡行者名為半人，修善行者名為滿人。如是一切經書、記論，皆因半字而為根本。若言如來及正解脫入於半字，是事不然。何以故？離文字故。是故，如來於一

⁸⁷ 大正藏：而不同於陰入界也；永樂北藏及龍藏：而亦不同陰界入也

切法無閔⁸⁸無著，真得解脫。

「何等名為解了字義？有知如來出現於世能減半字，是故名為解了字義。若有隨逐半字義者，是人不知如來之性。

「何等名為無字義耶？親近修習不善法者，是名無字。又，無字者，雖能親近修習善法，不知如來常與無常，恒與非恒，及法、僧二寶，律與非律，經與非經，魔說佛說。若有不能如是分別，是名隨逐無字義也。我今已說如是隨逐無字之義。善男子，是故汝今應離半字，善解滿字。」

迦葉菩薩白佛言：「世尊！我等應當善學字數。今我值遇無上之師，已受如來慇懃誨勅。」

佛讚迦葉：「善哉！善哉！樂正法者，應如是學。」

鳥喻品第十四⁸⁹

佛復告迦葉⁹⁰：「善男子，鳥有二種，一名迦鄰提，二名鴛鴦，遊止共俱，不相捨離。是苦、無常、無我等法，亦復如是，不得相離。」

迦葉菩薩白佛言：「世尊！云何是苦、無常、

⁸⁸ 大正藏：礙

⁸⁹ 大正藏：大般涅槃經鳥喻品第十四

⁹⁰ 大正藏：爾時，佛告迦葉菩薩

無我如彼鴛鴦、迦鄰提鳥？」

佛言：「善男子，異法是苦、異法是樂；異法是常、異法無常；異法是我、異法無我。譬如稻米，異於麻麥，麻麥復異豆粟、甘蔗。如是諸種，從其萌芽，乃至華葉，皆是無常；果實成熟，人受用時，乃名為常。何以故？性真實故。」

迦葉白佛言：「世尊！如是等物，若是常者，同如來耶？」

佛言：「善男子，汝今不應作如是說。何以故？若言如來如須彌山，劫壞之時，須彌崩倒，如來爾時，豈同壞耶？善男子，汝今不應受持是義。善男子，一切諸法，唯除涅槃，更無一法而是常者，直以世諦言果實常。」

迦葉菩薩白佛言：「世尊！善哉！善哉！如佛所說。」

佛告迦葉：「如是，如是。善男子，雖修一切契經諸定，乃至未聞大般涅槃，皆言一切悉是無常。聞是經已，雖有煩惱，如無煩惱，即能利益一切人天。何以故？曉了己身有佛性故，是名為常。」

「復次，善男子，如菴羅樹⁹¹，其華始敷，

⁹¹ 大正藏：譬如菴羅樹

名無常相；若成果實，多所利益，乃名為常。如是，善男子，雖修一切契經諸定，未聞如是大涅槃時，咸言一切悉是無常。聞是經已，雖有煩惱，如無煩惱，即能利益一切人天。何以故？曉了己⁹²身有佛性故，是名為常。

「復次，善男子，譬如金鑛，消鎔⁹³之時，是無常相；鎔⁹⁴已成金，多所利益，乃名為常。如是，善男子，雖修一切契經諸定，未聞如是大涅槃時，咸言一切悉是無常。聞是經已，雖有煩惱，如無煩惱，即能利益一切人天。何以故？曉了己⁹⁵身有佛性故，是名為常。

「復次，善男子，譬如胡麻，未被壓時，名曰無常；既壓成油，多有利益，乃名為常。善男子，雖修一切契經諸定，未聞如是大涅槃時，咸言一切悉是無常。聞是經已，雖有煩惱，如無煩惱，即能利益一切人天。何以故？曉了己身有佛性故，是名為常。

「復次，善男子，譬如眾流，皆歸於海。一切契經諸定三昧，皆歸大乘《大涅槃經》。何以故？究竟善說有佛性故。善男子，是故，我言異

⁹² 大正藏：自

⁹³ 大正藏：融

⁹⁴ 大正藏：融

⁹⁵ 大正藏：自

法是常、異法無常，乃至無我亦復如是。」

迦葉菩薩白佛言：「世尊！如來已離憂悲毒箭。憂悲者⁹⁶，名為天，如來非天。憂悲者，名為人，如來非人。憂悲者，二十五有⁹⁷，如來非二十五有。是故，如來無有憂悲，何故稱言如來憂悲？」

「善男子，無想天者，名為無想，若無想者，則無壽命，若無壽命，云何而有陰界諸入？以是義故，無想天壽不可說言有所住處。善男子，譬如樹神，依樹而住，不得定言依枝、依節、依莖、依葉，雖無定所，不得言無；無想天壽，亦復如是。善男子，佛法亦爾，甚深難解，如來實無憂悲苦惱，而於眾生起大慈悲，現有憂悲，視諸眾生如羅睺羅。復次，善男子，無想天中所有壽命，唯佛能知，非餘所及，乃至非想非非想處亦復如是。

「迦葉，如來之性，清淨無染，猶如化身，云何當有憂悲苦惱？若言如來有⁹⁸憂悲者，云何能利一切眾生弘廣佛法？若言無者，云何而言等視眾生如羅睺羅？若不等視如羅睺羅，如是之言

⁹⁶ 大正藏：夫憂悲者；永樂北藏及龍藏：憂悲者

⁹⁷ 大正藏：名二十五有；永樂北藏及龍藏：二十五有

⁹⁸ 大正藏：有；永樂北藏及龍藏：無

則為虛妄。以是義故，善男子，佛不可思議，法不可思議，眾生佛性⁹⁹不可思議，無想天壽不可思議。如來有憂及以無憂是佛境界，非諸聲聞、緣覺所知。

「善男子，譬如空中，舍宅、微塵不可¹⁰⁰住立，若言舍宅不因空住，無有是處。以是義故，不可說舍住於虛空、不住虛空。凡夫之人，雖復說言舍住虛空，而是虛空實無所住。何以故？性無住故。善男子，心亦如是，不可說言住陰、界、入及以不住。無想天壽，亦復如是；如來憂悲，亦復如是。若無憂悲，云何說言等視眾生如羅睺羅？若言有者，復云何言性同虛空？」

「善男子，譬如幻師，雖復化作種種宮殿、殺生長養、繫縛放捨，及作金、銀、瑠璃、寶物、叢林、樹木，都無實性。如來亦爾，隨順世間示現憂悲，無有真實。善男子，如來已入大般涅槃，云何當有憂悲苦惱？若謂如來入於涅槃是無常者，當知是人則有憂悲。若謂如來不入涅槃，常住不變，當知是人無有憂悲。如來有憂及以無憂，無能知者。」

⁹⁹ 大正藏：眾生佛性；永樂北藏及龍藏：眾生性

¹⁰⁰ 大正藏：得；永樂北藏及龍藏：可

「復次，善男子，譬如下人，能知下法，不知中上；中者知中，不知於上；上者知上，及知中、下。聲聞、緣覺亦復如是，齊知自地。如來不爾，悉知自地及以他地。是故，如來名無閼智。示現幻化，隨順世間，凡夫肉眼謂是真實，而欲盡知如來無閼無上智者，無有是處。有憂無憂，唯佛能知。以是因緣，異法有我，異法無我，是名鴛鴦、迦鄰提性¹⁰¹。

「復次，善男子，佛法猶如鴛鴦共行，是迦鄰提及鴛鴦鳥，盛夏水長¹⁰²，選擇高原安處其子，為長養故，然後隨本安隱而遊。如來出世，亦復如是，化無量眾生¹⁰³令住正法。如彼鴛鴦、迦鄰提鳥，選擇高原安置其子，如來亦爾，令諸眾生所作辦已，即便入於大般涅槃。善男子，是名異法是苦、異法是樂，諸行是苦、涅槃是樂，第一微妙，壞諸行故。」

迦葉菩薩白佛言：「世尊！云何眾生得涅槃者，名第一樂？」

佛言：「善男子，如我所說：『諸行和合，名為老死。』」

¹⁰¹ 大正藏：性；永樂北藏及龍藏：鳥

¹⁰² 大正藏：漲

¹⁰³ 大正藏：化無量眾生；永樂北藏及龍藏：無量眾生

謹慎無放逸 是處名甘露
放逸不謹慎 是名為死句
若不放逸者 則得不死處
如其放逸者 常趣於死路

「若放逸者，名有為法，是有為法，為第一苦；不放逸者，則名涅槃，彼涅槃者，名為甘露、第一最樂。若趣諸行，是名死處，受第一苦。若至涅槃，則名不死，受最妙樂。若不放逸，雖習¹⁰⁴諸行，是亦名為常樂、不死、不破壞身。云何放逸？云何不放逸？非聖凡夫，是名放逸常死之法；出世聖人，是不放逸，無有老死。何以故？入於第一常樂涅槃。以是義故，異法是苦，異法是樂；異法是我、異法無我。如人在地，仰觀虛空，不見鳥跡。善男子，眾生亦爾，無有天眼，在煩惱中，而不自見有如來性。是故我說無我密教。所以者何？無天眼者，不知真我。橫計我故，因諸煩惱所造有為，即是無常。是故，我說異法是常、異法無常。

精勤¹⁰⁵勇健者 若處於山頂
平地及曠野 常見諸凡夫

¹⁰⁴ 大正藏：集

¹⁰⁵ 大正藏：進

昇大智慧殿 無上微妙臺

既自除憂患 亦見眾生憂

「如來悉斷無量煩惱，住智慧山，見諸眾生，常在無量億煩惱中。」

迦葉菩薩白佛言¹⁰⁶：「世尊！如偈所說，是義不然。何以故？入涅槃者，無憂無喜。云何得昇智慧臺殿？復當云何住在山頂而見眾生？」

佛言：「善男子，智慧殿者，即名涅槃。無憂患者，謂如來也；有憂患者，名凡夫人。以凡夫憂故，如來無憂。須彌山頂者，謂正解脫。勤精進者，譬須彌山無有動轉。地謂有為行也，是諸凡夫安住是地，造作諸行。其智慧者，則名正覺，離有常住故名如來。如來憫念無量眾生，常為諸有毒箭所中，是故名為如來有憂。」

迦葉菩薩白佛言¹⁰⁷：「世尊！若使如來有憂悲者，則不得稱為等正覺。」

佛告迦葉¹⁰⁸：「皆有因緣，隨有眾生應受化處，如來於中示現受生，雖現受生而實無生，是故，如來名常住法，如迦鄰提、鴛鴦等鳥。」

大般涅槃經卷第八

¹⁰⁶ 大正藏：迦葉菩薩復白佛言

¹⁰⁷ 大正藏：迦葉菩薩復白佛言

¹⁰⁸ 大正藏：佛言：「迦葉

大般涅槃經卷第九

北涼天竺三藏曇無讖譯 梵

宋沙門慧嚴慧觀同謝靈運再治

月喻品第十五

佛告迦葉：「譬如有人，見月不現，皆言：『月沒。』而作沒想，而此月性實無沒也。轉現他方，彼處眾生復謂：『月出。』而此月性實無出也。何以故？以須彌山障故不現。其月常生，性無出沒。如來、應供、正遍知亦復如是，出現三千大千世界或閻浮提，示有父母，眾生皆謂：『生閻浮提。』或閻浮提示現涅槃，如來之性實無涅槃，而諸眾生皆謂：『如來實般涅槃。』譬如月沒。善男子，如來之性實無生滅，為化眾生示有生滅。

「善男子，如此滿月，餘方見半；此方半月，餘方見滿。閻浮提人，若見月初，皆謂一日，起初月想；見月盛滿，謂十五日，生盛滿想。而此月性實無虧盈，因須彌山而有增減。善男子，如來亦爾，於閻浮提或現初生，或示¹⁰⁹涅槃。現始生時，猶如初月，一切皆謂童子初生；行於七步，

¹⁰⁹ 大正藏：現

如二日月；或復示現入於書堂，如三日月；示現出家，如八日月；放大智慧微妙光明，能破無量眾生魔眾，如十五日盛滿之月；或復示現三十二相、八十種好以自莊嚴而現涅槃，譬¹¹⁰如月蝕。如是眾生所見不同，或見半月，或見滿月，或見月蝕，而此月性實無增減、侵蝕之者，常是滿月。如來之身亦復如是，是故名為常住不變。

「復次，善男子，譬如滿月，一切悉現，在在處處，城邑、聚落、山澤水中，若井若池，及諸水器，一切皆現。有諸眾生，行百由旬、百千由旬，見月常隨，凡夫愚人妄生憶想，言：『我本於城邑屋宅見如是月，今復於此空澤見之，為是本月？為異於本？』各作是念月形大小，或言如鍍口，或言如車輪，或言如四十九由旬。一切皆見月之光明，或見團圓猶如金槃¹¹¹。是月性一，種種眾生各見異相。善男子，如來亦爾，出現於世，或有人天而作是念：『如來今者，在我前住。』復有畜生亦生是念：『如來今者，在我前住。』或有聾瘡，亦見如來有聾瘡相。眾生雜類，言音各異，皆謂如來悉同己語，亦各生念：『在我舍宅，

¹¹⁰ 大正藏：喻

¹¹¹ 大正藏：盤

受我供養。』或有眾生，見如來身廣大無量，或見微小，或有見佛是聲聞像，或復有見為緣覺像。有諸外道復各念言：『如來今者，在我法中出家學道。』或有眾生復作是念：『如來今者，獨為我故出現於世。』如來實性，譬如彼月，即是法身，是無生身、方便之身，隨順於世，示現無量本業因緣，在在處處示現有生，猶如彼月。以是義故，如來常住，無有變異。

「復次，善男子，如羅睺羅阿脩羅王以手遮月，世間之¹¹²人咸謂月蝕。阿脩羅王實不能蝕，以阿脩羅障其明故。是月團圓，無有虧損，但以手障故使不現。若攝手時，世間咸謂月復還生，皆言是月多受苦惱。假使百千阿脩羅王，不能惱之。如來亦爾，示有眾生於如來所，生羸惡心，出佛身血，起五逆罪至一闍提，為未來世諸眾生故，如是示現壞僧斷法而作留難。假使無量百千億¹¹³魔，不能侵出如來身血。所以者何？如來之身，無有血、肉、筋、脈、骨、髓，如來真實，實無惱壞，眾生皆謂：『法僧毀壞，如來滅盡。』而如來性，真實無變，無有破壞，隨順世間如是

¹¹² 大正藏：諸

¹¹³ 大正藏：諸；永樂北藏及龍藏：億

示現。

「復次，善男子，如二人鬪，若以刀杖傷身出血，雖至於死，不起殺想，如是業相，輕而不重。於如來所，本無殺心，雖出身血，是業亦爾，輕而不重。如來如是於未來世，為化眾生示現業報。

「復次，善男子，猶如良醫，勤教其子醫方根本：『此是根藥，此是莖¹¹⁴藥，此是色藥，種種相貌，汝當善知。』其子敬奉父之所勅，精勤習學，善解諸藥。是醫後時，壽盡命終，其子號慕而作是言：『父本教我，根藥如是，莖藥如是，華藥如是，色相如是。』如來亦爾，為化眾生示現制戒：『應當如是受持，莫犯作五逆罪、誹謗正法及一闡提。』為未來世起是事者，是故示現，欲令比丘，於佛滅後，作如是知：『此是契經甚深之義，此是戒律輕重之相，此是阿毗曇分別法句。』如彼醫子。

「復次，善男子，如人見月，六月一蝕¹¹⁵；而上諸天，須臾之間已見月蝕。何以故？彼天日長，人間短故。善男子，如來亦爾，天人咸謂如

¹¹⁴ 大正藏：莖；永樂北藏及龍藏：味

¹¹⁵ 大正藏：蝕；永樂北藏及龍藏：食

來短壽，如彼天人須臾之間頻見月蝕。如來又於須臾之間，示現百千萬億涅槃，斷煩惱魔、陰魔、死魔。是故，百千萬億天魔悉知如來入般涅槃。又復示現無量百千先業因緣，隨順世間種種性故，示現如是無量無邊不可思議。是故，如來常住無變。

「復次，善男子，譬如明月，眾生樂見，是故稱月號為樂見。眾生若有貪、恚、愚癡，則不得稱為樂見也。如來如是，其性純善，清淨無垢，是最可稱為樂見也。樂法眾生視之無厭，惡心之人不喜瞻覩。以是義故，故言如來譬如明月。

「復次，善男子，譬如日出有三時異，謂春、夏、冬，冬日則短，春日處中，夏日極長。如來亦爾，於此三千大千世界，為短壽者及諸聲聞示現短壽，斯等見已，咸謂如來壽命短促，譬如冬日。為諸菩薩示現中壽，若至一劫若減一劫，譬如春日。唯佛覩佛，其壽無量，譬如夏日。

「善男子，如來所說方等大乘微密之教，示現世間，雨大法雨。於未來世，若有人能護持是典，開示分別利益眾生，當知是輩是真菩薩，譬如盛夏，天降甘雨。若有聲聞、緣覺之人，聞佛如來微密之教，譬如冬日，多遇冷患。菩薩之人，

若聞如是微密教誨，如來常住，性無變易，譬如春日，萌芽開敷。而如來性實無長短，為世間故，示現如是，即是諸佛，真實法性。

「復次，善男子，譬如眾星，晝則不現，而人皆謂晝星滅沒，其實不沒，所以不現，日光映故。如來亦爾，聲聞、緣覺不能得見，猶如世人，不見晝星。

「復次，善男子，譬如陰闇，日月不現，愚人謂言：『日月失沒。』而是日月，實無失沒。如來正法滅盡之時，三寶現沒亦復如是，非為永滅。是故，當知如來常住，無有變易。何以故？三寶真性不為諸垢之所染故。

「復次，善男子，譬如黑月，彗星夜現，其明炎熾，暫出還沒，眾生見已，生不祥想。諸辟支佛亦復如是，出無佛世，眾生見已，皆謂如來真實滅度，生憂悲想。而如來身，實不滅沒¹¹⁶，如彼日月，無有滅沒。

「復次，善男子，譬如日出，眾霧悉除。此大涅槃微妙經典亦復如是，出興於世，若有眾生一經耳者，悉能除滅¹¹⁷一切諸惡、無間罪業。是

¹¹⁶ 大正藏：度

¹¹⁷ 大正藏：悉能滅除

大涅槃甚深境界不可思議，善說如來微密之性。以是義故，諸善男子、善女人等，應於如來生常住心，無有變易，正法不斷，僧寶不滅。是故，應當多修方便，勤學是典，是人不久當得阿耨多羅三藐三菩提。是故此經名為無量功德所成，亦名菩提不可窮盡。以不盡故，故得稱為大般涅槃；有善光故，猶如夏日；身無邊故，名大涅槃。

菩薩品第十六¹¹⁸

「復次，善男子，如日月光，諸明中最，一切諸明所不能及。大涅槃光亦復如是，於諸契經三昧光明最為殊勝，諸經三昧所有光明所不能及。何以故？大涅槃光能入眾生諸毛孔故。眾生雖無菩提之心，而能為作菩提因緣，是故復名大般涅槃。」

迦葉菩薩白佛言：「世尊！如佛所說『大涅槃光入於一切眾生毛孔，眾生雖無菩提之心，而能為作菩提因』者，是義不然。何以故？世尊！犯四重禁、作五逆人及一闍提，光明入身作菩提因者，如是等輩與持淨戒、修習諸善有何差別？若無差別，如來何故說四依義？世尊！又如佛言

¹¹⁸ 大正藏：大般涅槃經菩薩品第十六

『若有眾生聞大涅槃，一經於耳，則得斷除諸煩惱』者，如來云何先¹¹⁹說：『有人恒沙佛所發菩提心，聞大涅槃不解其義。』若不解義，云何能斷一切煩惱？」

佛言：「善男子，除一闡提，其餘眾生聞是經已，悉皆能作菩提因緣。法聲光明入毛孔者，必定當得阿耨多羅三藐三菩提。何以故？若有人能供養恭敬無量諸佛，方乃得聞《大涅槃經》，薄福之人則不得聞。所以者何？大德之人乃能得聞如是大事，凡夫下劣則不得聞。何等為大？所謂諸佛甚深祕藏，如來性是。以是義故，名為大事。」

迦葉菩薩白佛言：「世尊！云何未發菩提心者得菩提因？」

佛告迦葉：「若有聞是《大涅槃經》，言『我不用發菩提心』誹謗正法，是人即於夢中見羅刹像，心中怖懼¹²⁰。羅刹語言：『咄，善男子，汝今若不發菩提心，當斷汝命。』是人惶怖寤¹²¹已，即發菩提之心。是人命終，若在三趣及在人天，續復憶念菩提之心，當知是人是大菩薩摩訶薩也。」

¹¹⁹ 大正藏：先；永樂北藏及龍藏：上

¹²⁰ 大正藏：懼

¹²¹ 大正藏：覺

以是義故，是大涅槃威神之力，能令未發菩提心者作菩提因。善男子，是名菩薩發心因緣，非無因緣。以是義故，大乘妙典真佛所說。

「復次，善男子，如虛空中興大雲雨，注於大地，枯木、石山、高原、堆阜，水所不住，流注下田，陂池悉滿，利益無量一切眾生。是大涅槃微妙經典亦復如是，雨大法雨，普潤眾生，唯一闡提發菩提心，無有是處。

「復次，善男子，譬如焦種，雖遇甘雨，百千萬劫終不生芽；芽若生者，無有是處。一闡提輩亦復如是，雖聞如是大般涅槃微妙經典，終不能發菩提心芽；若能發者，無有是處。何以故？是人斷滅一切善根，如彼焦種，不能復生菩提根芽。

「復次，善男子，譬如明珠置濁水中，以珠威德，水即為清；投之淤泥，不能令清。是大涅槃微妙經典亦復如是，置餘眾生五無間罪、四重禁法濁水之中，猶可澄清發菩提心；投一闡提淤泥之中，百千萬歲，不能令清起菩提心。何以故？是一闡提滅諸善根，非其器故。假使是人百千萬歲聽受如是《大涅槃經》，終不能發菩提之心。所以者何？無善心故。

「復次，善男子，譬如藥樹，名曰藥王，於諸藥中，最為殊勝，若和乳酪、若蜜、若酥、若水、若漿、若末、若丸，若以塗創¹²²、薰身、塗目，若見若嗅，能滅眾生一切諸病。如是藥樹不作是念：『一切眾生，若取我根，不應取葉；若取葉者，不應取根；若取身者，不應取皮；若取皮者，不應取身。』是樹雖復不生是念，而能除滅一切病苦。善男子，是大涅槃微妙經典亦復如是，能除一切眾生惡業、四波羅夷、五無間罪、若內若外所有諸惡，諸有未發菩提心者，因是則得發菩提心。何以故？是妙經典，諸經中王，如彼藥樹諸藥中王。若有修習是大涅槃及不修者，若聞有是經典名字，聞已敬信，所有一切煩惱重病皆悉除滅，唯不能令一闍提輩安住阿耨多羅三藐三菩提。如彼妙藥，雖能療愈種種重病，而不能治必死之人。

「復次，善男子，如人手瘡，捉持毒藥，毒則隨入；若無瘡者，毒則不入。一闍提輩亦復如是，無菩提因，如無瘡者，毒不得入。所謂瘡者，即是無上菩提因緣；毒者，即是第一妙藥；全無瘡者，謂一闍提。

¹²² 大正藏：瘡

「復次，善男子，譬如金剛，無能壞者，悉能破壞一切之物，唯除龜甲及白羊角。是大涅槃微妙經典亦復如是，悉能安止無量眾生於菩提道，唯不能令一闍提輩，立菩提因。

「復次，善男子，如馬齒草、娑羅翅樹、尼迦羅樹，雖斷枝莖，續生如故。不如多羅，斷已不生。是諸眾生亦復如是，若得聞是《大涅槃經》，雖犯四禁及五無間，猶故能生菩提因緣。一闍提輩則不如是，雖得聽受是妙經典，而不能生菩提道因。

「復次，善男子，如佉陀羅樹¹²³、鎮頭迦樹，斷已不生。一闍提輩亦復如是，雖得聞是《大涅槃經》，而不能發菩提因緣。

「復次，善男子，譬如大雨，終不住空。是大涅槃微妙經典亦復如是，普雨法雨，於一闍提則不能住。是一闍提，周體密緻，猶如金剛，不容外物。」

迦葉菩薩白佛言：「世尊！如佛說偈：

不見善不作 唯見惡可作
是處可怖畏 猶如險惡道

「世尊！如是所說有何等義？」

¹²³ 大正藏：如佉陀羅

佛言：「善男子，不見者，謂不見佛性；善者，即是阿耨多羅三藐三菩提；不作者，所謂不能親近善友；唯見者，見無因果；惡者，謂謗方等大乘經典；可作者，謂一闍提說無方等。以是義故，一闍提輩無心趣向清淨善法。何等善法？謂涅槃也。趣涅槃者，謂能修習賢善之行。而一闍提無賢善行，是故不能趣向涅槃。是處可畏者，謂謗正法。誰應怖畏？所謂智者。何以故？以謗法者無有善心及方便故。險惡道者，謂諸行也。」

迦葉復言：「如佛所說：

云何見所作 云何得善法

何處不怖畏 如王夷坦道

「是義何謂？」

佛言：「善男子，見所作者，發露諸惡，從生死際所作諸惡悉皆發露，至無至處。以是義故，是處無畏。譬如人王，所遊正路，其中盜賊，悉皆逃走。如是發露，一切諸惡悉滅無餘。復次，不見所作者，謂一闍提所作眾惡而不自見。是一闍提，憍慢心故，雖多作惡，於是事中，初無怖畏，以是義故，不得涅槃，譬如獼猴，捉水中月。善男子，假使一切無量眾生一時成就阿耨多羅三藐三菩提已，此諸如來亦復不見彼一闍提得成菩

提，以是義故，名不見所作。又復，不見誰之所作？所謂不見如來所作。佛為眾生說有佛性，一闍提輩流轉生死不能知見，以是義故，名為不見如來所作。又，一闍提見於如來畢竟涅槃謂真無常，猶如燈滅，膏油俱盡。何以故？是人惡業不損滅¹²⁴故。若有菩薩所作善業迴向阿耨多羅三藐三菩提時，一闍提輩雖復毀訾、破壞、不信，然諸菩薩猶故施與，欲共成就無上之道。何以故？諸佛法爾。

作惡不即受 如乳即成酪
猶灰覆火上 愚者輕蹈之

「一闍提者，名為無目，是故不見阿羅漢道。如阿羅漢不行生死險惡之道。以無目故，誹謗方等，不欲修習如阿羅漢勤修慈心。一闍提輩不修方等，亦復如是。若人說言：『我今不信聲聞經典，信受大乘，讀誦解說，是故我今即是菩薩。一切眾生悉有佛性，以佛性故，眾生身中即有十力、三十二相、八十種好。我之所說不異佛說。汝今與我俱破無量諸惡煩惱，如破水瓶，以破結故，即能得見阿耨多羅三藐三菩提。』是人雖作

¹²⁴ 大正藏：滅；永樂北藏及龍藏：滅

如是演說，心實不信有如來性¹²⁵，為利養故，隨文而說。如是說者，名為惡人。如是惡人，不速受果，如乳成酪。譬如王使，善能談論，巧於方便，奉命他國，寧喪身命，終不匿王所說言教。智者亦爾，於凡夫中不惜身命，要必宣說大乘方等如來祕藏，一切眾生皆有佛性。

「善男子，有一闍提作羅漢像，住於空處誹謗方等大乘經典。諸凡夫人見已，皆謂：『真阿羅漢！是大菩薩摩訶薩！』是一闍提惡比丘輩，住阿蘭若處，壞阿蘭若法，見他得利，心生嫉妬，作如是言：『所有方等大乘經典，悉是天魔波旬所說。』亦說：『如來是無常法。』毀滅正法，破壞眾僧。復作是言：『波旬所說，非善順說。』作是宣說邪惡之法，是人作惡不即受報，如乳成酪，灰覆火上，愚輕蹈之，如是人者，謂一闍提。是故當知大乘方等微妙經典必定清淨，如摩尼珠投之濁水，水即為清，大乘經典亦復如是。

「復次，善男子，譬如蓮華，為日所照，無不開敷。一切眾生亦復如是，若得見聞大涅槃日，未發心者，皆悉發心，為菩提因。是故，我說大涅槃光所入毛孔必為妙因。彼一闍提，雖有佛性，

¹²⁵ 大正藏：其心實不信有佛性；永樂北藏及龍藏：心實不信有如來性

而為無量罪垢所纏，不能得出，如蠶處繭。以是業緣，不能得生菩提妙因，流轉生死，無有窮已。

「復次，善男子，如優鉢羅華、鉢頭摩華、拘物頭華、芬陀利華，生淤泥中而不為彼淤泥所污。若有眾生，修大涅槃微妙經典亦復如是，雖有煩惱，終不為彼煩惱所污。何以故？以知如來性、相、力故。

「善男子，譬如有國，多清涼風，若觸眾生身諸毛孔，能除一切鬱蒸之惱。此大乘典《大涅槃經》亦復如是，遍入一切眾生毛孔，為作菩提微妙因緣，除一闍提。何以故？非法器故。

「復次，善男子，譬如良醫，解八種藥，滅一切疾¹²⁶，唯不能除阿薩闍病。一切契經、禪定、三昧亦復如是，能治一切貪、恚、愚癡諸煩惱病，能拔煩惱毒刺等箭，而不能治犯四重禁、五無間罪。善男子，復有良醫過八種術，能除眾生所有疾¹²⁷苦，唯不能治必死之病。是大涅槃大乘經典亦復如是，能除眾生一切煩惱，安住如來清淨妙因，未發心者令得發心，唯除必死一闍提輩。

「復次，善男子，譬如良醫，能以妙藥治諸

¹²⁶ 大正藏：病

¹²⁷ 大正藏：病

盲人，令見日月星宿諸明、一切色像，唯不能治生盲之人。是大乘典《大涅槃經》亦復如是，能為聲聞、緣覺之人開發慧眼，令其安住無量無邊大乘經典。未發心者，謂犯四禁、五無間罪，悉能令發菩提之心，唯除生盲一闡提輩。

「復次，善男子，譬如良醫，善解八術，為治眾生一切病苦，種種方藥隨病與之，所謂吐下、塗身、灌鼻，若薰、若洗、若丸、若散，一切諸藥，而貧愚人不欲服之。良醫憫念，即將是人還其舍宅，彊與令服。以藥力故，所患得除。女人產者¹²⁸，闍樓¹²⁹不出，若服此藥，闍樓¹³⁰即出，亦令嬰兒安樂無患。是大乘典《大涅槃經》亦復如是，所至之處若至舍宅，能除眾生無量煩惱，犯四重禁、五無間罪未發心者，悉令發心，除一闡提。」

迦葉菩薩白佛言：「世尊！犯四重禁及五無間名極重惡，譬如斷截多羅樹頭，更不復生。是等未發菩提之心，云何能與作菩提因？」

佛言：「善男子，是諸眾生，若於夢中夢墮地獄、受諸苦惱，即生悔心：『哀哉！我等自招

¹²⁸ 大正藏：難；永樂北藏及龍藏：者

¹²⁹ 大正藏：兒衣；永樂北藏及龍藏：闍樓

¹³⁰ 大正藏：兒衣；永樂北藏及龍藏：闍樓

此罪，若我今得脫是罪者，必定當發菩提之心。我今所見最是極惡。』從是寤¹³¹已，即知正法有大果報。如彼嬰兒漸漸長大，常作是念：『是醫最良，善解方藥，我本處胎，與我母藥，母以藥故，身得安隱，以是因緣，我命得全。奇哉！我母受大苦惱，滿足十月，懷抱我身，既生之後，推乾去濕，除去不淨大小便利，乳哺長養，將護我身。以是義故，我當報恩¹³²，色養侍衛，隨順供養。』犯四重禁及無間罪，臨命終時，念是大乘《大涅槃經》，雖墮地獄、畜生、餓鬼、天上、人中，如是經典亦為是人作菩提因，除一闡提。

「復次，善男子，譬如良醫及良醫子，所知深奧，出過諸醫，善知除毒無上呪術。若惡毒蛇、若龍、若蝮，以諸呪術呪藥使¹³³良。以此良藥用塗革屣，以此革屣觸諸毒蟲，毒為之消，唯除一毒，名曰大龍。是大乘典《大涅槃經》亦復如是，若有眾生犯四重禁、五無間罪，悉能消滅，令住菩提，如藥革屣能消眾毒，未發心者能令發心，安住無上菩提之道。是彼大乘《大涅槃經》威神藥故，令諸眾生生於安樂，唯除大龍一闡提輩。

¹³¹ 大正藏：覺

¹³² 大正藏：當報母恩

¹³³ 大正藏：令

「復次，善男子，譬如有人，以新¹³⁴毒藥用塗大鼓，於眾人中，擊令發聲，雖無心欲聞，聞之皆死，唯除一人不橫死者。是大乘典《大涅槃經》亦復如是，在在處處諸行眾生¹³⁵有聞聲者，所有貪欲、瞋恚、愚癡悉皆滅盡。其中雖有無心思念，是大涅槃因緣力故，能滅煩惱而結自滅。犯四重禁及五無間，聞是經已，亦作無上菩提因緣，漸斷煩惱，除不橫死一闍提輩。

「復次，善男子，譬如闇夜，諸所營作一切皆息，若未訖者，要待日明。學大乘者，雖修契經、一切諸定，要待大乘大涅槃日，聞是如來微密之教，然後乃當造菩提業，安住正法。猶如天雨，潤益增長一切諸種，成就果實，悉除饑饉，多受豐樂。如來祕藏無量法雨亦復如是，悉能除滅八種熱病。是經出世，如彼果實，多所利益安樂一切，能令眾生見如來性。如《法華》中八千聲聞得受記莖，成大果實，如秋收冬藏，更無所作。一闍提輩亦復如是，於諸善法無所營作。

「復次，善男子，譬如良醫，聞他人子非人所持，尋以妙藥，并遣一使，勅語使言：『卿持

¹³⁴ 大正藏：雜；永樂北藏及龍藏：新

¹³⁵ 大正藏：中；永樂北藏及龍藏：生

此藥，速與彼人，彼人若遇諸惡鬼神，以藥力故，悉當遠去。卿若遲晚，吾當自往，終不令彼枉橫¹³⁶死也。若彼病人，得見使者及吾威德，眾¹³⁷苦當除，得安隱樂。』是大乘典《大涅槃經》亦復如是，若比丘、比丘尼、優婆塞、優婆夷及諸外道，有能受持如是經典，讀誦通利，復為他人分別廣說，若自書寫，令他書寫，斯等皆為菩提因緣。若犯四禁及五逆罪，若為邪鬼毒惡所持，聞是經典，所有諸惡，悉皆消滅，如見良醫，惡鬼遠去。當知是人是真菩薩摩訶薩也。何以故？暫得聞是大涅槃故，亦以生念如來常故。暫得聞者，尚得如是，何況書寫、受持、讀誦？除一闡提，其餘皆是菩薩摩訶薩。

「復次，善男子，譬如聾人，不聞音聲。一闡提輩亦復如是，雖復欲聽是妙經典而不得聞。所以者何？無因緣故。

「復次，善男子，譬如良醫，一切醫方無不通達，兼復廣知無量呪術。是醫見王，作如是言：『大王今者必有死病¹³⁸。』其王答言：『卿不見我腹內之事，云何而言有必死病？』醫復白言¹³⁹：

¹³⁶ 大正藏：枉橫

¹³⁷ 大正藏：諸；永樂北藏及龍藏：眾

¹³⁸ 大正藏：有必死病；永樂北藏及龍藏：必有死病

¹³⁹ 大正藏：醫即答言；永樂北藏及龍藏：醫復白言

『若不見信，應服下藥，既下之後，王自驗之。』王不肯服。爾時，良醫以呪術力令王隱處遍生瘡疱，兼復癩下，蟲血雜出。王見是已，生大怖懼，讚彼良醫：『善哉！善哉！汝¹⁴⁰先所白，吾不用之，今乃知汝¹⁴¹於吾此身作大利益。』恭敬是醫猶如父母。是大乘典《大涅槃經》亦復如是，於諸眾生，有欲無欲，悉能令彼煩惱崩落。是諸眾生乃至夢中夢見是經，恭敬供養，譬如大王，恭敬良醫。是大良醫知必死者，終不治之。是大乘典《大涅槃經》亦復如是，終不能治一闍提輩。

「復次，善男子，譬如良醫，善知八種悉能療治一切諸病，唯不能治必死之人。諸佛菩薩亦復如是，悉能救療一切有罪，唯不能治必死之人一闍提輩。

「復次，善男子，譬如良醫，善知八種微妙經術，復能博達過於八種，以己所知先教其子，若水、若陸、山谷藥草，悉令識知。如是漸漸教八事已，次復教餘最上妙術。如來、應供、正遍知亦復如是，先教其子諸比丘等，方便除滅一切煩惱，修學淨身不堅固想，謂水、陸、山谷。水

¹⁴⁰ 大正藏：卿；永樂北藏及龍藏：汝

¹⁴¹ 大正藏：卿；永樂北藏及龍藏：汝

者，譬身受苦，如水上泡；陸者，譬身不堅，如芭蕉樹；山谷者¹⁴²，譬煩惱中修無我想。以是義故，身名無我。如來如是於諸弟子漸漸教學九部經法，令善通利，然後教學如來祕藏，為其子故，說如來常。如來如是說大乘典《大涅槃經》，為諸眾生已發心者及未發心作菩提因，除一闡提。如是，善男子，是大乘典《大涅槃經》無量無邊¹⁴³，不可思議，未曾有也。當知即是無上良醫，最尊最勝，眾經中王。

「復次，善男子，譬如大船，從海此岸至於彼岸，復從彼岸還至此岸。如來¹⁴⁴正覺亦復如是，乘大涅槃大乘寶船，周旋往反¹⁴⁵，濟度¹⁴⁶眾生，在在處處，有應度者，悉令得見如來之身。以是義故，如來名曰無上船師。譬如有船，則有船師；有船師¹⁴⁷，則有眾生度¹⁴⁸於大海。如來常住化度眾生，亦復如是。

「復次，善男子，譬如有人，在大海中，乘船欲渡，若得順風，須臾之間，則能得過無量由

¹⁴² 大正藏：其山谷者

¹⁴³ 大正藏：數

¹⁴⁴ 大正藏：來；永樂北藏及龍藏：是

¹⁴⁵ 大正藏：返

¹⁴⁶ 大正藏：渡

¹⁴⁷ 大正藏：以有船師

¹⁴⁸ 大正藏：渡

旬；若不得者，雖復久住，經無量歲不離本處，有時船壞，沒水而死。眾生如是，在彼愚癡生死大海，若¹⁴⁹諸行船，若得值遇大般涅槃猛利之風，則能疾至¹⁵⁰無上道岸；若不值遇，當久流轉無量生死，或時破壞，墮於地獄、畜生、餓鬼。

「復次，善男子，譬如有人，不遇風王，久住大海，作是思惟：『我等今者，必在此死。』如是念時，忽遇利風，隨順渡海。復作是言：『快哉！是風未曾有也，令我等輩，安隱得過大海之難。』眾生如是，久處愚癡生死大海，困苦窮悴，未遇如是大涅槃風，則應生念：『我等必定墮於地獄、畜生、餓鬼。』是諸眾生思惟是時，忽遇大乘大涅槃風，隨順吹向入於阿耨多羅三藐三菩提，方知真實，生奇特想。歎言：『快哉！我從昔來，未曾見聞如是如來微密之藏。』爾乃於是《大涅槃經》生清淨信。

「復次，善男子，如蛇脫皮，為死滅不？」

「不也。世尊！」

「善男子，如來亦爾，方便示現棄捨毒身，可言如來無常滅耶？」

¹⁴⁹ 大正藏：乘

¹⁵⁰ 大正藏：到

「不也。世尊！」

「如來於此閻浮提中，方便捨身，如彼毒蛇捨於故皮。是故，如來名為常住。」

「復次，善男子，譬如金師，得好真金，隨意造作種種諸器。如來亦爾，於二十五有悉能示現種種色身，為化眾生拔生死故。是故，如來名無邊身，雖復示現種種諸身，亦名常住，無有變易。」

「復次，善男子，如菴羅樹及閻浮樹，一年三變，有時生華，光色敷榮；有時生葉，滋茂蓊鬱；有時凋¹⁵¹落，狀似枯死。善男子，於意云何？是樹實為枯死不耶？」

「不也。世尊！」

「善男子，如來亦爾，於三界中示三種身，有時初生，有時長大，有時涅槃，而如來身實非無常。」

迦葉菩薩讚言：「善哉！誠如聖言¹⁵²：如來常住，無有變易。」

「善男子，如來密語甚深難解。譬如大王告諸群臣：『先陀婆來。』先陀婆者，一名四實：一

¹⁵¹ 大正藏：彫

¹⁵² 大正藏：教

者，鹽；二者，器；三者，水；四者，馬。如是四物共同一名，有智之臣善知此名，若王洗時，索先陀婆，即便奉水；若王食時，索先陀婆，即便奉鹽；若王食已，欲飲漿時，索先陀婆，即便奉器；若王欲遊¹⁵³，索先陀婆，即便奉馬。如是智臣，善解大王四種密語。是大乘經亦復如是，有四無常，大乘智臣應當善知：若佛出世，為眾生說如來涅槃。智臣當知，此是如來為計常者說無常相，欲令比丘修無常想。或復說言正法當滅。智臣應知，此是如來為計樂者說於苦相，欲令比丘多修苦想。或復說言，我今病苦，眾僧破壞。智臣當知，此是如來為計我者說無我相，欲令比丘修無我想。或復說言，所謂空者，是正解脫。智臣當知，此是如來說正解脫無二十五有，欲令比丘修學空想。以是義故，是正解脫則名為空，亦名不動。謂不動者，是解脫中無有苦故，是故不動。是正解脫為無有相，謂無相者，無有色、聲、香、味、觸等，故名無相。是正解脫常、不變易，是解脫中無有無常、熱惱、變易。是故，解脫名曰常住、不變、清涼。或復說言，一切眾生有如來性。智臣當知，此是如來說於常法，欲

¹⁵³ 大正藏：若王遊時

令比丘修正常法。是諸比丘若能如是隨修¹⁵⁴學者，當知是人真我弟子，善知如來微密之藏，如彼大王智慧之臣，善知王意。善男子，如是大王亦有如是密語之法，何況如來而當無耶？善男子，是故，如來微密之教難可得知，唯有智者乃能解我甚深佛法，非是世間凡夫品類所能信也。

「復次，善男子，如波羅奢樹、迦尼迦樹、阿叔迦樹，值天亢旱，不生華實，及餘水陸所生之物，皆悉枯悴，無有潤澤，不能增長，一切諸藥，無復勢力。善男子，是大乘典《大涅槃經》亦復如是，於我滅後，有諸眾生，不能恭敬，無有威德。何以故？是諸眾生，不知如來微密藏故。所以者何？以是眾生薄福德故。

「復次，善男子，如來正法將欲滅盡，爾時，多有行惡比丘，不知如來微密之藏，懶墮¹⁵⁵懈怠，不能讀誦宣揚、分別如來正法。譬如癡賊，棄捨真寶，擔負草木，不解如來微密藏故，於是經中懈怠不勤。哀哉！大險！當來之世甚可怖畏。苦哉！眾生不勤聽受是大乘典《大涅槃經》！唯諸菩薩摩訶薩¹⁵⁶，能於是經，取真實義，不著文字，

¹⁵⁴ 大正藏：順

¹⁵⁵ 大正藏：懶墮

¹⁵⁶ 大正藏：唯諸菩薩摩訶薩等

隨順不逆，為眾生說。

「復次，善男子，如牧牛女，為欲賣乳，貪多利故，加二分水轉賣與餘牧牛女人；彼女得已，復加二分轉復賣與近城女人；彼女得已，復加二分轉復賣與城中女人；彼女得已，復加二分詣市賣之。時有一人，為子納婦，急須好乳，以供賓客，至市欲買。是賣乳者，多索價直，是人語言：『此乳多水，實不直是。值我今日瞻待¹⁵⁷賓客，是故當取。』取已還家，用煮作糜¹⁵⁸，無復乳味。雖無乳味，於苦味中猶勝千倍。何以故？乳之為味，諸味中最。善男子，我涅槃後，正法未滅餘八十年，爾時，是經於閻浮提當廣流布。是時，當有諸惡比丘抄略是經，分作多分，能滅正法色、香、美味。是諸惡人，雖復誦讀如是經典，滅除如來深密要義，安置世間莊嚴文飾無義之語，抄前著後，抄後著前，前後著中，中著前後。當知如是諸惡比丘，是魔伴侶，受畜一切不淨之物，而言如來悉聽我畜。如牧牛女多加水乳，諸惡比丘亦復如是，雜以世語，錯定是經，令多眾生不得正說、正寫、正取、尊重讚歎、供養恭敬。是

¹⁵⁷ 大正藏：侍

¹⁵⁸ 大正藏：煮用作糜

惡比丘為利養故，不能廣宣流布是經，所可分流少不足言，如彼牧牛貧窮女人展轉賣乳，乃至作糜而無乳味。是大乘典《大涅槃經》亦復如是，展轉薄淡，無有氣味。雖無氣味，猶勝餘經超逾千倍¹⁵⁹，如彼乳味於諸苦味其勝千倍。何以故？是大乘典《大涅槃經》，於聲聞經最為上首，譬如牛乳，味中最勝。以是義故，名大涅槃。

「復次，善男子，若善男子、善女人等，無有不求男子身者。何以故？一切女人皆是眾惡之所住處。復次，善男子，如蟲蝸¹⁶⁰水不能令此大地潤洽，其女人者，姪欲難滿亦復如是。譬如大地，一切作丸令如芥子，如是等男與一女人共為欲事猶不能足；假使男子數如恒沙，與一女人共為欲事亦復不足。善男子，譬如大海，一切天雨、百川、眾流皆悉歸注，而彼大海未曾滿足。女人之法亦復如是，假使一切悉為男子，與一女人共為欲事而亦不足。復次，善男子，如阿叔迦樹、波吒羅樹、迦尼迦樹，春華開敷，群蜂嘒¹⁶¹取，色、香、細味不知厭足。女人欲男，亦復如是，不知厭足。善男子，以是義故，諸善男子、善女

¹⁵⁹ 大正藏：猶勝餘經越踰千倍

¹⁶⁰ 大正藏：蚊蚋

¹⁶¹ 大正藏：嘒

人等，聽是大乘《大涅槃經》，常應呵責女人之相，求於男子。何以故？是大乘典有丈夫相，所謂佛性。若人不知是佛性者，則無男相。所以者何？不能自知有佛性故。若有不能知佛性者，我說是等名為女人；若能自知有佛性者，我說是人為大丈夫；若有女人能知自身定有佛性，當知是等即為男子。善男子，是大乘典《大涅槃經》無量無邊不可思議功德之聚。何以故？以說如來祕密藏故。是故，善男子、善女人，若欲速知如來密藏，應當方便勤修此經。」

迦葉白佛言¹⁶²：「世尊！如是，如是。如佛所說，我今已有丈夫之相，得入如來微密藏故。如來今日始覺悟我，因是即得決定通達。」

佛言：「善哉！善哉！善男子，汝今隨順世間之法而作是說。」

迦葉復言：「我不隨順世間法也。」

佛讚迦葉：「善哉！善哉！汝今所知無上法味，甚深難知而能得知。如蜂采¹⁶³味，汝亦如是。復次，善男子，如蟲子澤不能令此大地沾¹⁶⁴洽，當來之世，是經流布亦復如是，如彼蟲澤。正法

¹⁶² 大正藏：迦葉菩薩白佛言

¹⁶³ 大正藏：採

¹⁶⁴ 大正藏：沾

欲滅，是經先當沒於此地，當知即是正法衰相。

「復次，善男子，譬如過夏，初月名秋，秋雨連霖¹⁶⁵。此大乘典《大涅槃經》亦復如是，為彼南方諸菩薩故，當廣流布，降霖¹⁶⁶法雨，彌滿其處。正法欲滅，當至闕寶，具足無缺潛沒地中。或有信者，或不信者，如是大乘方等經典甘露法味悉沒於地。是經沒已，一切諸餘大乘經典皆悉滅沒。若得是經具足無缺，人中象王諸菩薩等，當知如來無上正法將滅不久。」

爾時，文殊師利白佛言：「世尊！今此純陀猶有疑心，惟願如來重為分別，令得除斷。」

佛言：「善男子，云何疑心？汝當說之，當為除斷。」

文殊師利言：「純陀心疑如來常住，以得知見佛性力故。若見佛性而為常者，本未見時，應是無常；若本無常，後亦應爾。何以故？如世間物本無今有，已有還無，如是等物，悉是無常。以是義故，諸佛、菩薩、聲聞、緣覺無有差別。」

爾時，世尊即說偈言：

本有今無 本無今有

¹⁶⁵ 大正藏：注

¹⁶⁶ 大正藏：注

三世有法 無有是處

「善男子，以是義故，諸佛、菩薩、聲聞、緣覺亦有差別，亦無差別。」

文殊師利讚言：「善哉！誠如聖言¹⁶⁷。我今始解諸佛、菩薩、聲聞、緣覺亦有差別，亦無差別。」

迦葉菩薩白佛言：「世尊！如佛所說：『諸佛、菩薩、聲聞、緣覺，性無差別。』惟願如來分別廣說，利益安樂一切眾生。」

佛言：「善男子，諦聽諦聽，當為汝說。善男子，譬如長者，多畜乳牛，有種種色，常令一人守護將養。是人有時，為祠祀故，盡穀¹⁶⁸諸牛著一器中，見諸牛乳同一白色，尋便驚怪：『牛色各異，其乳云何皆同一色？』是人思惟：『知¹⁶⁹此一切皆是眾生業報因緣，令乳色一。』善男子，聲聞、緣覺、菩薩亦爾，同一佛性，猶如彼乳。所以者何？同盡漏故。而諸眾生言佛、菩薩、聲聞、緣覺而有差別，有諸聲聞、凡夫之人，疑於三乘云何無別？是諸眾生久後自解，一切三乘同一佛性，猶如彼人解悟乳相由業因緣。」

¹⁶⁷ 大正藏：教

¹⁶⁸ 大正藏：構

¹⁶⁹ 大正藏：如

「復次，善男子，譬如金鑛，陶¹⁷⁰鍊滓穢，然後消融，成金之後，價直無量。善男子，聲聞、緣覺、菩薩亦爾，皆得成就同一佛性。何以故？除煩惱故，如彼金鑛除諸滓穢。以是義故，一切眾生同一佛性，無有差別。以其先聞如來密藏，後成佛時，自然得知，如彼長者知乳一相。何以故？以斷無量億煩惱故。」

迦葉菩薩白佛言：「世尊！若一切眾生有佛性者，佛與眾生有何差別？如是說者，多有過咎。若諸眾生皆有佛性，何因緣故，舍利弗等以小涅槃而般涅槃？緣覺之人於中涅槃而般涅槃？菩薩之人於大涅槃而般涅槃？如是等人若同佛性，何故不同如來涅槃而般涅槃？」

「善男子，諸佛世尊所得涅槃，非諸聲聞、緣覺所得。以是義故，大般涅槃名為善有。世若無佛，非無二乘得二涅槃。」

迦葉復言：「是義云何？」

佛言：「無量無邊阿僧祇劫，乃有一佛出現於世，開示三乘。善男子，如汝所言菩薩、二乘無差別者，我先於此如來密藏《大涅槃》中已¹⁷¹

¹⁷⁰ 大正藏：淘

¹⁷¹ 大正藏：已；永樂北藏及龍藏：以

說其義：諸阿羅漢無有善有。何以故？諸阿羅漢悉當得是大涅槃故。以是義故，大般涅槃有畢竟樂。是故，名為大般涅槃。」

迦葉言：「如佛說者，我今始知差別之義、無差別義。何以故？一切菩薩、聲聞、緣覺未來之世，皆當歸於大般涅槃，譬如眾流歸於大海。是故，聲聞、緣覺之人悉名為常，非是無常。以是義故，亦有差別，亦無差別。」

迦葉言：「云何性差別？」

佛言：「善男子，聲聞如乳，緣覺如酪，菩薩之人如生熟酥，諸佛世尊猶如醍醐。以是義故，大涅槃中說四種性而有差別。」

迦葉復言：「一切眾生性相云何？」

佛言：「善男子，如牛新生，乳血未別，凡夫之性雜諸煩惱，亦復如是。」

迦葉復言：「拘尸那城有旃陀羅，名曰歡喜，佛記是人，由一發心，當於此界千佛數中，速成無上正真之道。以何等故，如來不記尊者舍利弗、目犍¹⁷²連等速成佛道？」

佛言：「善男子，或有聲聞、緣覺、菩薩作誓願言：『我當久久護持正法，然後乃成無上佛

¹⁷² 大正藏：犍

道。』以發速願，故與速記。

「復次，善男子，譬如商人，有無價寶詣市賣之，愚人見已，不識輕笑。寶主唱言：『我此寶珠，價直無數。』聞已復笑，各各相謂：『此非真寶，是玻璃珠。』善男子，聲聞、緣覺亦復如是，若聞速記，則便懈怠，輕笑薄賤，如彼愚人，不識真寶。於未來世，有諸比丘，不能精勤修習善法，貧窮、困苦、飢餓所逼，因是出家長養其身，心志輕躁，邪命諂曲。若聞如來授諸聲聞速疾記者，便當大笑、輕慢、毀訾¹⁷³。當知是等即是破戒，自言已得過人之法。以是義故，隨發速願故與速記，護正法者為授遠記。」

迦葉菩薩復白佛言：「世尊！菩薩¹⁷⁴云何當得不壞眷屬？」

佛告迦葉：「若諸菩薩勤加精進欲護正法，以是因緣，所得眷屬不可沮壞。」

迦葉菩薩復白佛言：「世尊！何因緣故，眾生得此脣口乾焦？」

佛告迦葉：「若有不識三寶常存，以是因緣，脣口乾焦。如人口爽，不知甜、苦、辛、醋、鹹、

¹⁷³ 大正藏：皆

¹⁷⁴ 大正藏：菩薩摩訶薩

淡六味差別。一切眾生，愚癡無智，不識三寶是長存法，是故名為脣口乾焦。

「復次，善男子，若有眾生，不知如來是常住者，當知是人，則為生盲。若知如來是常住者，如是之人，雖有肉眼，我說是等名為天眼。復次，善男子，若有能知如來是常，當知是人，久已修習如是經典，我說是等亦名天眼。雖有天眼，而不能知如來是常，我說斯等名為肉眼。是人乃至不識自身手、足、支節，亦復不能令他識知，以是義故，名為肉眼。

「復次，善男子，如來常為一切眾生而作父母。所以者何？一切眾生種種形類，二足、四足、多足、無足，佛以一音而為說法，彼彼異類各各得解，悉皆歎言：『如來今日為我說法。』以是義故，名為父母。

「復次，善男子，如人生子，始十六月，雖復語言，未可解了。而彼父母欲教其語，先同其音，漸漸教之，是父母語可不正耶？」

「不也。世尊！」

「善男子，諸佛如來亦復如是，隨諸眾生種種音聲而為說法，為令安住佛正法故，隨所應見而為示現種種形像，如來如是同彼語言，可不正

耶？」

「不也。世尊！何以故？如來所說如師子吼，隨順世間種種音聲，而為眾生歎¹⁷⁵說妙法。」

大般涅槃經卷第九

¹⁷⁵ 大正藏：勸

● 結誦儀

補闕真言

(三編)

南無喝囉怛那. 哆囉夜耶. 佉囉佉囉. 俱住俱住.
摩囉摩囉. 虎囉. 吽. 賀賀. 蘇怛那. 吽. 潑抹拏. 娑
婆訶.

南無佛 南無法 南無僧 (合掌三稱)

南無一切如來、應、正等覺 (合掌三稱)

南無本師釋迦牟尼佛 (合掌三稱)

南無大般涅槃經 (合掌三稱)

發願文

(一編)

志心懺悔。我(某甲)與一切衆生，從無始來，
迷失真心，流轉生死，六根罪障，無量無邊，圓
妙佛乘，無以開解，一切所願，不得現前。我今
讀誦大般涅槃經，以此善根，發露黑惡，過、現、
未來三業所造無邊重罪，皆得消滅，身心清淨，

惑障蠲除，福智莊嚴，淨因增長，自他行願速得圓成。願諸如來常在說法，所有功德起隨喜心，迴向菩提，證常樂果。命終之日，正念現前，面見彌陀及諸聖眾，一剎那頃，生蓮華中。普願眾生，俱成佛道。

迴向偈

(一編)

誦經功德殊勝行 無邊勝福皆迴向
普願沉溺諸有情 速往無量光佛刹
十方三世一切佛 一切菩薩摩訶薩
摩訶般若波羅蜜

迴向偈

(一編)

願以此功德 莊嚴佛淨土
上報四重恩 下濟三途苦
若有見聞者 悉發菩提心
盡此一報身 同生極樂國

三皈依

(一編)

自皈依佛，當願眾生，體解大道，發無上心；
自皈依法，當願眾生，深入經藏，智慧如海；自
皈依僧，當願眾生，統理大眾，一切無礙。和南
聖眾。



此咒置經書中可滅誤跨之罪

南无护法韦驮尊天菩萨

